

Roma

Paulo âirjaet keirje.

¹ Galalupne, nâmâ Paulo Yesu Kristogât hon bawa manman. Nâ âmâ Kristone menekmâ aposolo nogonmâ Anutugât pat âlep den maktere ârândân akmâ ariâkgât mem kepilânegep.

² Akto Anutugât den pat âlep are âmâ Anutune tâmbâne dondâ propetelupne makyengimbo kulemgoyi.

³ Kulemgoyi aregât keirje amâ Anutugât nanne miawagep. Yâk âmâ hâk olop miawakmâ Dawidigât hakulupne yâk yengâlânba miawagep.

⁴ Gârâmâ Heak han kau kau akmap arekne kârikne akmâ yâk amâ Anutugât nanne hain miawakmâ maknengiep. Aregât keirje momonânba agalewân miawakmâ tek tekjân miawakto âmâ Yesu Kristo amâ Humonenne dâm nângâyion.

⁵ Yâkne âmâ han kalem aknengim aposologât âi nengiep. Nengim âmâ yâkgât kotje patje ariâkgât akto hânne hânne arim hârok makyengiennje bikjande nângâm Yesu nânganmâ aregât launje lokowaigât âi nengiep.

⁶ Akto Anutune Yesu Kristogât kâmot miawagâk dâm olonyegep yâk yengâlânba ye gai hainâk olonyegep.

⁷ Roma kepihan gâtne Anutune han kalem akyengim nângât kâmot dâm yengonlep. Yengât âmâ hin ulilandân. Ewenenne Anutu akto Humonenne Yesu Kristo han kalem akmâ damun yengim

akbela han kalem akto lumbe yengâlân hâtikom yendo biwiyenje sândugewiâp. Hain.

Pauloŋe Roma luâk âmbâle yekberâm magep.

⁸ Galalupne yeŋe Yesu nânğanmâ kepilâm manmai, aregât pat sambelembo nânğambiâ ârândân aktâpgât Yesu Kristogât akmâ nâ Anutu mepainje mem mandân.

⁹ Nâ Anutugât nanŋaet pat âlep den makmâ hannande Anutu manandere keine nânğâp gât yâkgât metenân den ire makyengire nânğâŋet.

¹⁰ Nâ hokboâk hokboâk yengât akmâ Anutu ulilaŋman. Akto Anutuŋe nânğambo ârândân akto dâp peneniŋdo yengâlân togowian a gai ulilaŋman.

¹¹ Nâ togom ye yekbiangât nânğâm mandân. Togom yekmâ han biwiyenje yeuk agep aregât owâiwaigât meme akyengire kârikŋe kinmâ manŋetgât makyengim tânyenŋuwian.

¹² Tânyenŋum âmâ nâ yengâlân manmâ tatere Yesu nânğanmâ manmaengât maganŋi goanŋi akmâ tân agu agu akmâ manbaen.

¹³ Galama, nânğât keine pâpkowâigât hin makyengiwe. Nâ luâk kâmotŋe kâmotŋe bikŋe bikŋe arim makyengim mandere bikŋande nânğambiâ âinaet bunŋe âlim yiepgât miawakniŋep. Are hainâgâk yengâlân togom makyengire âigât bunŋe miawakniŋbiap gât nânğân. Gârâmâ togowerâm akmâ malân ain siâ siâ bikŋande hikonekto bo togoân.

¹⁴ Dâ nânŋe luâk hârok, Girik luâk akto Anutu bonânğanmai akto nânğâ nânğâ luâk akto kopane hârok makyengiŋwian gât âi tatniŋdâp aregâlâk nânğân.

15 Aregât Roma luâk ye hainângâk pat âlep makyenjiwerâm hannande owâim manman.

16 Nâ den pat âlepgât akmâ aṅunṅe olop bo akman. Akmâ nâṅgâre aṅunṅe olop bo akmap. Den pat âlepṅe amâ Anutugât kârikṅeṅe olowâk arekṅe luâk âmbâle Yesu nâṅgaṅbiâ ârândâṅ mem meṅâleyekbiap, Yuda luâk a soṅ akto Girik luâk hârok.

17 Den pat âlep arekṅe amâ Anutugât ârândâṅ dâp mem miawakmâ tek tekṅân miawakmâ katmap. Amâ hin. Yesu nâṅgaṅbiâ amâ Anutuṅe yekto ârândâṅ akbiapgât keiṅe. Akto nâṅgaṅbiâ Anutugât ârândâṅ dâp yem âgâwiap. Aregât Anutuṅe makto kulemgoyi bikṅe hin tatâp, Anutuṅe yekto ârândâṅ akmap yâkṅe amâ Anutugâlâk nâṅgaṅmâ manmâ âgâwai.

Luâk hârokṅe Anutu hamiaṅi.

18 Anutugât kuk miawakmap aregât keiṅe hin. Luâk âmbâleṅe amâ Anutu hepunmâ bâleṅe akmâ den bunṅe bo agâkgât kei dâpṅe gulip komai. Aregât Anutugât kukṅande himbimân ba miawakyeṅgimap.

19 Akto Anutuṅe ikiye keiṅe bikṅe tektekṅân mem miawakyeṅgimapgât ekmâ nâṅgâmai.

20 Amâ Anutuṅe hân liulewânbak Anutugât keiṅe luâkṅe bo ekmai are akto keiṅe kârikṅe manmâ âgâwiap are akto ikiye keiṅe pagaleṅe are hârok miapṅân tatmap. Are amâ wan me wan Anutuṅe mângim ketuguep arekṅe hekatnengimap. Aregât luâk âmbâle hârokṅe nen Anutugât keiṅe bo nâṅgâmaen dâwaigât dâp bo tatâp.

21 Luâk âmbâle hainare âmâ Anutu mandâp nângâmai. Gârâmâ imâ Anutu Humo dâm bo kânngoanmai akto mepainje bo meanmai. Anutu hamianmaigât nângâ nângâ yeje gulip akmap akto biwiyenje hândâkne katip yengumap.

22 Akto ainba hin dâmai, “Nen nângâ nângâ nenje humo aktâp.” dâmai amâ nângâm hilipkoma. Nângâm hilipkom sinduk akmâ manmai.

23 Hain akmâ manmâ Anutu manman kârikne yâkgât pagalene hâkân akmâ âmâ aregât dumñân tukup siâ ketugum luâk momai yengât otneyenje me lâut gât otneje me sonjo gât otneje me mulungât otneje mângim âmâ are nângâmbiâ humo akto pâwut ligiyengimai.

24 Hain akbiâ Anutu ye yekmâ hâkân akyengimbo hanyenje egâlian gulip bâlene akmâ han hâkyenje mem bâlimai.

25 Yâkne Anutu bundâk amboje hamianmâ âmâ hiangimaigât nângâmbiâ humo akmap. Hain akto Anutu wan me wan yân liulep are nângâmbiâ bunje akto hoñ aganmai gârâmâ wan me wan aregât Amboje amâ hâkân akmâ hamianmai. Amâ Anutu egâlian olop manmâ âgâambo nângandenje humo akmâ âgâwiapgât ârândân akmap. A bundâk.

26 Gârâmâ luâk âmbâle are Anutu hepunyekto egâlian bâlene dondâ penianmai. Hain akto âmbâlene luâkdâ âmbendâ aregât agak meme âlepne are hepunmâ âmbâleâk egâlianmai.

27 Akto luâk hainâk luâkdâ âmbendâ manman hâkân akmâ hanyenje egâlian gât kâlâp humo ondo luâgâk yekmâ egâlianmâ agak meme bâlene aganimai. Aregât han biwiyenje hilip komapgât hâunje Anutu hâkyenân pando hâk hilâlâm

nângâmai.

²⁸ Hain akmâ manmâ âmâ Anutugât keiņe nângâmai are hâkâņ akmâ manmaigât Anutuņe hanyeņe gisap kombo siâ me siâ bo agakņe are âmâ akmâi.

²⁹ Hain akmâ siâ me siâ bâleņe keiņe keiņe membiâ âgâmap. Bâleņe akmâ egâlianĵ bâleņe akmâ hanyeņân bâleņeâk nângâm galagât nângâmbiâ gembo kuk henĵân akmâ luâk bikņe yeņgumbiâ moyi dâ bikņe yeņĵât kotyeņe mem bâlimai. Akto galagât hogo hogo akmâ hamiņâņgen makmai.

³⁰ Hain akmâ luâk siâgât agak meme âlepņe ekbiâ gembo hianĵi den makbiâ kotņe gemap. Hain akmâ Anutu gasa agaņmai. Akto âgâ âgâņe akmâ yeņe hâk mem agatmâ bâleņeet dâp egâlianĵmai. Hain akmâ ewe memelupyenĵeet den komai.

³¹ Hain akmâ han nângâ nângâ bâlâk manmâ Anutu bo nâņgaņmâ âmâ han kalem bâlâk manmai.

³² Hain akmâ âmâ Anutugât den ârândânĵ kârikņe yendâp amâ luâk me âmbâle hain akbiâ âmâ momogât dâp miawakyenĵiwiap ĵât den are nângâm metembiâ hanâk dâm bâleņeâk manmâ âgâmai. Akto areâk bo. Bikņande hainâk akbiâ nângâmbiâ humo akto heroņe akyenĵimai.

2

Bâleņeet hâuņe hamepņe.

¹ Aregât ĵâ yu kulengoân are oyaņmâ nâ hain bo akman dât mon? Hain bo. Yeņe hain are akmâ siânba hâkyeņe tunbiâ âmâ bo ârândânĵ akmap. Akto yeņe siânba hâkyeņe tunmâ agak meme bâleņe hainâk mem âmâ yeņe hâkyeņe tunanĵiwai.

² Anutuņe luâk âmbâle bâleņe akmai denân katyekmâ hâuņe umatņe yeņgimbo âmâ ârândâņ akmap nâņgâmaen.

³ Aregât gâ luâgâk aregât luâk bikņe yeņgât dosa makmâ hâkyeņe tunmâ areâk akmat gârâmâ agak meme bâleņe hainâk akmat. Aregât nâ Anutuņe gâunniņmâ âmâ umatņân bo katnekbiap dâmat mon? Hain bo.

⁴ Anutuņe han kalem akmâ unsambe akgiņmâ bo hâkâņ giņmap aregât hâkâņ akmâ manmat mon? Anutuņe gâ hange purik kat dâm han kalem akgiņmap are bo nâņgâm kotgâmat mon?

⁵ Gârâmâ gâ han kârik akmâ hange bo purikatmenâ âmâ Anutugât kuk metņe ârândâņ are miawakbiawân ain om bâligeķbiap.

⁶ Aregât sopņân Anutuņe luâk âmbâle agak meme nenņaet dowân hâuņe nengiwiap. Hain.

⁷ Luâk âmbâle bikņande âmâ pagaleņaet pat akto Anutuņe nenekto huraguâķgât manman kârikņe egâliaņmai are Anutuņe manman kârikņe yeņgiwiap.

⁸ Dâ luâk âmbâle bikņe âmâ den kautņe bunņe hâkâņ akmâ âmâ bâleņe mem manne dâm yeņaet nâņgâmbiâ humo akmap yeņgâlân âmâ kuk metņe bâleņe miawak yeņgiwiap.

⁹ Bâleņe meme luâk hârok Yuda luâk soņ akto Yuda gâtņe bo manmai gai yeņgâlân sik sererek metņe akto hamep humo miawakyeņgiwiap.

¹⁰ Gârâmâ ârândâņ akmâ manbai hârok Yuda luâk are akto Yuda luâk bo manmai yâk Anutuņe pagaleņe yeņgimbo biwiyeņe sândugembo patyeņe ârândâņ akmâ âgâwiap.

¹¹ Are âmâ Anutuņe yeņgiep. Anutuņe âmâ horat

gorat bo akmâ potat yekmap.

¹² Akto luâk âmbâle bikne Anutugât den kârikne Mose ne kulengoep den are bâlâk manmâ âmâ bâle ne memai amâ yâk hârok den kârikne bâlâk bâlim metewai. Dâ den kârikne olop manmâ bâle ne memai yâk hârok den kârikne ne agak memeye ne mem miawakye ngim den âiân makmâ katyekmâ kotgâ ye ngiwiap.

¹³ Aregât ke ne hin. Anutugât den kârikne yân ondop ye nân nâ ngâwai yâk âmâ Anutune yekto ârândân bo akmâ. Gârâmâ nâ ngâm lokomai yâk âmâ ye ârândân dâm makyen giwiap.

¹⁴ Akto Yuda luâk âmbâle bo manmai yâk den kârikne bâlâk manmai gârâmâ hanyen ande den kârikne lokom âmâ den kârikne bâlâk arekne den kârikne olop tirip hainare akmai.

¹⁵ Hain akbiâ âmâ den kârikne han biwiyenân yonâk talep aregât ke ne miawakmap. Akto hanyenân tuk tuk koyen gim âmâ nâ ngâ nâ ngâ ye ande purik gurik akmâ siân kotgâ akmâ dâ siân makmâ mulunyekmap.

¹⁶ Are amâ sop humoân âmâ Anutune Yesu Kristo aga ndo han nen nân siâ me siâ tiwân yendâp aregât ke ne mem tekteknân miap katbiap. Aregât ke ne amâ nâ den pat makyen giman a hainâk tekteknân miawakbiap. Hain.

Yuda luâk âmbâle ne Mose gât den ne bo lokoyi.

¹⁷ Akto Yuda luâk gâ hin dâmat mon? Nâmâ Anutune menekmâ ike ne den kârikne are ni ne p gât nâ ngâre humo aktâp dâmat aregât hin makgin be.

18 Gâ Anutugât lau den nângâmat akto bikñande den kârikñe aregât keñje makñiñi aregât ire agakñe ire bo agakñe nângâm potatmat.

19 Hain akmâ âmâ gugaet hin dâmat, “Nâ dewun yeñe bokbokñe manmai are âlepñe kewugu yekmâ dâwân kat yekman, akto hândâkñân manmai are âlepñe mem pagaleyekman,

20 akto luâk han kopañe are âlepñe manmâ miwindik yekman akto nanañ siâ me siâ âlepñe dâp hekat yeñgiman, akto den kârikñe aregât keñje amâ nângâ nângâ akto den bunñe aregât keñje tatmap dâmat mon?”

21 Gâ hain makmat aregât luâk âmbâle bikñe makyenñim âmâ guge biwige bo magañmat. Gâ kâmbu bo mem dâm makyenñimat guge kâmbu akmat mon?

22 Luâkdâ âmbendâ bo hepun akñet dâm makyenñim benñe gâ âmbenge hepunmat mon? Gâ lâpio sârekomatñe lâpio opmânjaet siâ me siâ kâmbu memmat mon?

23 Gâ Anutugât den kârikñe nângâman dâmat amâ bo lokomat aregât bikñande gekmâ Anutugât den nângâmbiâ gemap.

24 Aregât Anutugât den kulemgoyi bikñe hin tatâp, “Ye Yuda luâk âmbâleñe bâleñe akbiâ aregât Yuda luâk âmbâle bo manmai arekñe yekmâ Anutugât kotñe makmâ sârek kombiâ gemap.”

25 Gâ hâkgân Yudagât tirip tatgñdâp are den kârikñe lokomenâ bunñe aktâp. Dâ den kârikñe loñgaimbiâ âmâ hâkge gâiyi are yânñe akbiap.

26 Gârâmâ aregât Yuda tirip bâlâk manmai arekñe Anutugât den lokom âmâ tiripdâ hainare akbai.

²⁷ Hain akmâ tirip bâlâk manmapne den kârikne lokomap yâkne âmâ keige gagaiwiap. Gagaim âmâ gâ Anutugât den kârikne nângâmat akto Yudagât tirip olop manmat gâ den kârikne lonḡaimat aregât hâkge tunmâ keige gagaiwiap.

²⁸ Aregât lâuwânje makbe. Luâk siâ yân hâkne Yuda luâk tirip akbiap amâ hâkneak manbiap. Hain arekne Yuda luâk bunne bo akbiap.

²⁹ Amâ hanne Yuda luâk arekne bunne akbiap. Amâ Yuda luâk arekne hanjân tirip bunne akmap yâkgât amâ Yuda luâk bunne dâmaen. Dâ hâkñân den kâriknegât tirip areâk mem manmap are bunne bo. Gârâmâ han biwiñân tirip mem manmap arekne amâ Yuda luâk bunne dâmaen. Yâk hain aregât herone amâ luâkgât bo. Anutuḡe nângâmbo âlepne akbiapgât.

3

Agak meme bâleḡande Anutugât den bo kombiap.

¹ Akto yu kulengoân are oyaḡmâ âmâ Yuda luâk âmbâleḡe âmâ Yuda gâtne bo are bo ewangiyekbaen dâi mon? Me Yuda tirip are yânne aktâp dâi mon?

² Hain bo dâwei. Yuda luâk âmâ siâ me siâ biwirâ yeyengiep. Yâk âmâ Anutuḡe den pat keiḡe keiḡe makyengimbo aregât ambone agi.

³ Gârâmâ Yuda luâk âmbâle bikḡande Anutu hanyenande bo nânḡanbiâ aregât hin dâwaen mon? Bo nânḡanbiâ aregât Anutuḡe makto den kârikne tatmâ gaep are mem bâliâi hain dâwaen mon?

⁴ Are bo dondâḡe. Anutuḡe makto siâḡe hin kulengoep,

Anutu, gâ makmenâ âmâ denge bunje ârândânâk akbiâp, are nânghâenje huraguwiap. Akto gâ makmâ kotgâ akmâ potatmenâ âmâ siâne denge bo mendo gewiâp. Den are bunje akto luâk âmbâle hârokne hiangimai akto Anutuje konok âmâ bundâk makmap keije are miawaktâp.

⁵ Are oyanmâ gain dâwaen? Bâleje nennande Anutu ârândân manmanjaet keije mem miap panmapgât bâleje aktenje Anutuje aregât hâuje nengimbo ârândân bo akbiap dâwaen mon? Den are amâ luâk nânghâ nânghâgât dowân maktân.

⁶ Hain bo dondâ. Anutuje bâleje nennaet hâuje bo nengimap dâine gain gain akmâ luâk âmbâle hârok nengât agak memenenne bâleje are mem kepilâwâi?

⁷ Aregât siâne hin dâwiap mon? Hiangi den-nande Anutugât den bunje tângombo kotje patje are humo akmâ sambelewiap, aregât wangât Anutuje nâ bâleje agângât hâuje ninmap? Amâ bo ârândân akmap.

⁸ Akto bâlejnân mandenne purik âgâm bunje âlepje miawakbiap mon? Nen âmâ hain bo dâmaen gârâmâ luâk biknande âmâ Paulomañe hain dâmai dâyi. Aregât hâuje miawakyengimbo ârândân akbiap.

⁹ Aregât gain gain nânghâm hêngemgowaen? Yuda luâkne luâk bikne ewangiyekmaen mon? Bo dondâ. Emelâk maktân. Yuda luâk akto Yuda luâk bo nen hârok bâlejaet hoñ manmaen.

¹⁰ Aregât Anutugât den hin tatâp,
 “Luâk âmbâle siâ ârândân siâ bo mandâp. Bo dondâne.

11 Hârokņe agak meme âlepņaet keiņe bo nâņgâmai. Akto hârokņe Anutu konmâ kulâgâtmâ bo akmai.

12 Luâk hârokņe Anutu hamianmâ bâleņe akmâ hâkņe hâkņe agi. Siâņe siâ me siâ âlepņe bo akmap. Bo dondâņe.

13 Hanyeņe are momoņe yeņgât dop. Elewetyeņe purik dâmbo hiangi den gamap. Biwityeņande âmâ hâme hewukgât kundat bâleņe mem miawâk panmap.

14 Lauyeņân âmâ sait akto gasagât den pikmâ lugum lokom yemap.

15 Luâk yeņguenņe moņet dâm aregât keiyenande owâiņeâk tâlimai.

16 Akto itiņ gulam meyekmâ welam yeņeâk mem miap panmai.

17 Akto han biwi konok manbiâ biwiyeņe sândugewiapgât pat bo nâņgâmai.

18 Akto Anutu bo nâņganmâ yâkgât hamep bo akmai.” are amâ Anutugât denņe maktâp.

19 Aregât keiņe hin. Den kârikņe arekņe den kârikņe nâņgâmaen nen damun nenņe akmap. Arekņeak keinenņe gagaim, lau nenņe gisapkomap. Akto luâk hârok dosanenņe Anutugâlân miawakmâ metemap.

20 Aregât den kârikņe lokone dâm âi humo mendenņe Anutuņe nenekto bo ârândâņ akmap. Hain gârâmâ benņe den kârikņe arekņe dosa nenņe mem miap panmap. Hain.

Anutuņe nenekto ârândâņ akmapgât den.

21 Dâ hinņe âmâ Anutuņe nenekmâ dosayeņe bo dâwiapgât dâp miawagân miawaktâp. I are

âmâ den kârikne lokowaengât dop bo. Gârâmâ den kârikne akto propeteñe kulemgoyi den arekne makmâ miawagep.

²² Anutuñe nenekto ârândân akbiapgât dâp amâ nen Yesu Kristo nânğanmaen nengât hârok. Siâne me siâne Yesu Kristo nânğanđo ainâk ârândângât dâp miawaganmap.

²³ Akto emelâk nen hârokne bâleñe akmâ dosagât pat agion, aregât Anutugât egâlian pagalenân ariwaengât dop bo tatnengiep.

²⁴ Aregât hainâk nen hârok Yesu Kristone bâleñe nenñe miepgât Anutuñe han kalemñaet akmâ dosa bâlâk dâm menenekmap.

²⁵ Anutuñe dâmbo Yesuñe bâleñe nenñaet akmâ sumbe kato Anutuñe kuk agađo bo agep. Aregât nenñe nânğanbaenñe sumbe are mendenñe dosa nenñe bo agep. Anutuñe hain agepgât ikinje agak meme ârândân are miapñân miawagep. Akto ulikñân bâleñe akmâ gayiongât dosa aregât hâuñe dowâk bo nengiep, a hainâk nânğâyion.

²⁶ Anutuñe hain akmap âmâ ârândân amboñe manmap dâm nânğâyion. Dâ Yesu hannenñande nânğanđenñe dosayenñe bo tatyenğiâp dâwiapgât keinje hinñeâk tek tegiâkgât hain are agep.

²⁷ Aregât nen nenñaet akmâ nânğâenñe humo akbiapgât dop yendâp mon? Bo. Hâk nânğâ nânğâenñe are nânğâenñe bâliâp. Are amâ den kârikne lokoyiongât bo miawaktâp, amâ Yesu nânğanđenñe hâknenñe akto nânğâ nânğâenñe yânñe aktâp.

²⁸ Aregât den hin nânğâenñe yembiâp. Den kârikne lokoenñe dosayenñe bo dâwiapgât dop bo

tatâp. Yesu nânğanmâ kepilâenņe âmâ dosanenņe bo dâwiâp.

²⁹ Dâ Anutu Yuda luâk nengâlâgâk damun mon? Bo. Yâk amâ Yuda gâtņe bo yâk yeņgât damun gai.

³⁰ Anutunenņe konok yâkņe nen Yudagât tirip mem manmaen me tirip bâlâk manmai nen hârokņe Yesu nânğanđenņe dosayeņe bo dâm menenekmap.

³¹ Aregât Yesu nânğanmâ âmâ den kârikņe nânğâenņe giep mon? Bo donđâne. Nenņe Yesu nânğanmâ âmâ den kârikņe tângomaen.

4

Anutuņe Abrahamgât luâk âlepņe dâep.

¹ Akto Yuda nengât hakunenņe Abraham âmâ wan penianep? dâwaen.

² Abrahamņe Anutugât den kârikņe lokombo Anutuņe ekmâ dosage bo tatgiņđâp dâep dâine benņe Abrahamņe ikiņaet nânğâmbo humo akbop. Amâ Anutugât metenân âmâ bo.

³ Akto Anutugât denân hin yendâp aregâten, “Abrahamņe Anutu nânğanđo aregât dosage bo dâm makmâ miawaganep.”

⁴ Dâ luâk siâņe âi mendo âmâ benņe hâuņe waņmaen are amâ han kalem nenņaet pat bo. Amâ hâu kutigit aņmaen.

⁵ Dâ luâk siâņe âi bo mem âmâ Anutuņe bâleņe meme nengât dosa hepunmap yâk nânğanbiap âmâ ainâk Anutuņe luâk aregât nânğâm kepilâ kepilâņaet akmâ nânğâm âmâ dosa bo tatgiņđâp dâm maganbiap.

⁶ Aregât keiņe Dawidiņe hainâgâk nânġâm âmâ luâk siâ âmâ âi bo mendo Anutuņe ġaunaņmâ dosage bo dâwiapgât yâkgât heroņe maroņegât keiņe hin kulengoep.

⁷ “Dosa umatņe mem manmai yâk Anutuņe dosayeņe bo tatyenġiâp dâwiapgât are nânġâmbiâ ukenņe akbiap.

⁸ Akto luâk siâņe bâleņe akmâ gaep yâk Humoņe nânġaņdo dosage olop bo aktât dâm maganġiap yâk nânġâmbo amâ ukenņe humo akbiap.”

⁹ Akto ukenņe humo are âmâ Yuda tirip olop nengâlâk pat aktâp mon? Me tirip bâlâk yâk yengât olop aktâp? Aregât Abrahamġât pat nânġaenņe keiņe miawakberâp. Hin. Abrahamņe Anutu nânġaņdo Anutuņe ekto ârândâņ agep. Hain nânġâmaen.

¹⁰ Akto wan sowân dosage bo dâm maganġep? Tirip olop malewân me tirip bâlâk malewân? Tirip olop malewân ain bo maganġep. Ulikņân Abraham tirip bâlâk mandoân Anutuņe dosaye hepunaņep.

¹¹ Yâk tirip bâlâk malewân Anutu nânġaņdo dosaye hepunaņep aregât tirip kulem beirâ waņep. Anutuņe hain aganġepġât benņe Abrahamņe hinņe tirip bâlâk manmaiņe Anutu nânġaņmaigât dosa bâlâk hinare akmai yâk yengât Eweyeņe ulikņân meme agep.

¹² Abraham hain agepġât âmâ nen tirip olop manmaen nengât Ewenenņe agep. Dâ tirip hâknennân miawagep aregât bo. Abrahamņe hâknân tirip bo talewân âmâ Anutu nânġaņminep, dâp areâk watmâ Anutu nânġaņmaen âmâ benņe Anutu amâ Humonenņe dâenņe ârândâņ akbiap.

13 Anutuņe Abrahamgât bâgilupņe hân hârok yeņgiwian dâm hângât pat katyeņgiep amâ den kârikņe loko lokogât akmâ bo. Abrahamņe Anutu nânğanmâ kepilâambo âmâ Anutuņe nânğambo ârândâņ agepgât Anutuņe hângât magep.

14 Amâ hingât. Anutuņe makmâ hâriep aregât pat amâ den kârikņe lokomai yâk yeņgât makmâ hâriep dâine benņe Anutu nânğanmaen are amâ yânņe akbop. Akto Anutuņe makmâ hâriep akai yânņe akbop.

15 Aregât keiņe hin. Den kârikņe arekņe amâ dosagât hâuņe kaknenņân katmap. Dâ den kârikņe bâlâgân âmâ den koko are bo miawakmap.

16 Are gârâmâ Anutu nânğanmâ kepilâmaen are nengât miawagep. Amâ wangât? Hingât. Anutuņe ukenņaet akmâ han kalem akmâ makmâ hârembo Abrahamgât kâmolân hârok yâk yeņgâlân miawagep. Dâ den kârikņe lokomai gâlâk bo. Abraham amâ nengât hakunenņe dâmaengât Abrahamņe Anutu nânğanđo bunņe agep amâ nen Anutu nânğanđenņe bunņe akmap aregât akmâ nengâlân miawagep.

17 Aregât keiņe Anutuņe makto kulengoep hin tatâp. “Nâņe luâk kâmotņe kâmotņe yâk yeņgât Eweyeņe akbiat dâm makmâ hâregiņđân.” dâep. Abrahamņe Anutu nânğanmâ hin nânğâm kârigiep, “Anutu amâ momoņe mem golâ katyekmap. Akto siâ me siâ bo yendâp are dâambo miawakmai.” hain nânğâep.

Abrahamņe Anutu nânğâm kepilâ aņep.

18 Akto Anutuņe, “Gângât kâlelupge biwirâ miawakbai” dâm magañep, den are nânğambo humo

agep. Akto den are biwiñân mem kârikñe mângim malepgât hânñe hânñe yâkgât bâgilupñe miawakbaigât nânğâep.

¹⁹ Hain akmâ âmâ hombaññe 100 malepgât ikiñe hâkñe serokñe akto Saragât hâkñe gai hainâgâk agep are ekmâ nânğâmbo umatñe bo agep. Akto Anutuñe magep are nânğâm âmâ bo hanoko agep.

²⁰ Akto Anutuñe pat âlepgât magep are nânğâm âmâ han biwiñe bo hogo agep. Amâ bunñerâm malep. Hain akmâ nânğañmâ kârigem Anutugât nânğâmbo âgâ anđo ikiñe biwi kat katgât kârikñe akmâ âgâep.

²¹ Amâ Anutuñe siâ me siâ makmâ hâriep are bunñe agâk dâmbo âlepñe miawakbiap nânğâep.

²² Hain nânğâepgât akto Anutu nânğañđo bunñe agepgât Anutuñe yâkgât nânğâm âmâ “Dosage bo tatgĩndâp.” dâm makto miawaganep.

²³ Akto Anutuñe dosage bo tatgĩndâp den are Abraham gâlâk bo magep.

²⁴ Nengât gai aktâp. Kembunenñe Yesu Kristo momoñân ba mem agalep Anutu yâk nânğañmaen nengât gai magep. Akto nengât akmâ miawaknengiwiap.

²⁵ Are âmâ Anutuñe makto Yesu dosa nenñæet akmâ moep. Mondo dosa bâlâk manbaengât âmâ Anutuñe momoñânba mem agalep.

5

Anutuñe nengât dosanenñe bo agep aregât biwinenñe mem sândugemap.

¹ Aregât nen Yesu nânğañjongât Anutuñe nenekto dosa nenñe bo agep. Aregât Anutuñe

Humonnenje Yesu Kristogât akmâ nângâmbo kuk bo akto biwinenje sândugemap.

² Yesuñeak hângi menengiepgât Anutuñe han kalem akmâ damunnenje akto yeukñân manmaen, akmâ maleine Anutugât kulem pagaleñe miawaknengimbo ekmâ egâlianjbaen.

³ Akto areâk bo. Umatñe miawaknengimbo arekñe amâ han biwinenje kârikñe ketugunengimap aregât bo hâkâñ akmaen. Aregât umatñe miawaknengimboân âmâ heronje akmaen.

⁴ Akto hâk hilâlâm nângâm bo hâkâñ aktenje âmâ wât kârikñe miawaknengimap. Akto wât kârikñande âmâ himbingât egâlianjbaengât mem miawaknengimap.

⁵ Himbingât egâlianjgât olop manbaen arekñe amâ bo pâpkom añun añmaen. Amâ hingât. Anutuñe ikinje ukenjaet akmâ Heak owâinjeâk nengimapgât Anutugât han kalem are biwinenñân lugum totokombo gem tatmapgât bo pâpkomaen.

⁶ Akto Yesu bo nângañion sop ain tân agu agugât dâp bo tatnengiep, sop ain Kristonje bâleñe meme nengât hâu mem moep.

⁷ Aregât hin nângâen. Luâk siâñe luâk siâ ârândânâk manmap are tângowerâm mombiap hainare bo tatâp. Dâ luâk âlepñe han kalem akmâ manmap are tângowerâm mombiap hainare konok konok tatmai mon?

⁸ Dâ Anutuñe nen bâleñe malionân ain han kalemjaet akmâ makto Kristonje bâleñe nenjaet akmâ moep. Mondo ainâk Anutugât han kalemñe amâ miawakto egion.

⁹ Akto ire Kristogât hepŋaet akmâ dosa bâlâk agiongât Anutugât kuk sopŋe miawakbiawân âlepŋe tânnengumbo yâkgât akmâ kuk are bo miawaknengiwiap.

¹⁰ Amâ hingât. Nen Anutu gasa aganmâ mandenŋe nanŋe moepgât akmâ han kalem aknengiep amâ âi humo. Are hinŋe Anutuŋe han kalem aknengiewân amâ manmanŋaet akmâ manman kârikŋân katnenekbiapgât amâ âi owâiŋe.

¹¹ Akto areâk bo. Kembunenŋe Yesu Kristoŋe Anutu olop mendunenegepgât aregât yâkgât akmâ Anutu yâk makmâ egâlianŋe aganmâ heronŋe akmaen.

Adamŋe bâleŋe agepgât momogât dâp miawagep.

¹² Aregât hin nâŋgâne. Luâk Adam konokŋe bâleŋe agepgât bâleŋe keiŋe keiŋe hânân miawagep. Hain akto bâleŋaet momo miawaknengiep. Akto luâk hârok bâlim meteyiongât momogât patŋe luâk hârok katip nenguep.

¹³ Akto den kârikŋe bo miawaktoân bâleŋande ulikŋân miawakmâ yiep. Dâ den kârikŋe bo talep amâ yân yem gaep.

¹⁴ Gârâmâ momoŋe Adamgâlân keiŋe katmâ luâk manmâ gayi yâk damun yeŋgum gam mando âmâ Mose miawagep. Amâ Adamŋe den koko agepgât hainare bo agi yâk yeŋgâlân miawagep. Akto Adam amâ luâk siâ beirâ miawakbiapgât tirip akmâ malep.

¹⁵ Dâ han kalemŋe âmâ den kokogât dop bo aktâp. Luâk konokgât den kokoŋaet biwirâŋe mom

hilip aguyi. Hain akto Anutugât han kalemņe amâ luâk konok Yesu Kristo yâkgât âlepņaet akmâ Adamgât den koko ewangim luâk biwirâ nengâlân miawagep.

¹⁶ Aregât lâuwâņe makbe. Luâk konok Adam yâkņe bâleņe agepgât nen hârok den âiân miawak-tenņe dosanenņe miawakbiap. Dâ bâleņe nenņe humo aktoân âmâ Anutuņe han kalem nengiep arekņe nen dosanenņe boân manbaengât mem miawaknengiep. Aregât Anutuņe han kalem nengiep are akto luâk konokņe bâleņe akto miawaknengiep are amâ dop yetņe konok bo.

¹⁷ Amâ Adam luâk konokņe den koepgât momeņe damunnenņe akmâ gaep. Aregât Anutuņe han kalemņe yem âgâwiapgât akto dosa bâlâk manman are nengiwiap. Aregât amâ nenņe luâk konok Yesu Kristo yâkgât akmâ manman kârikņân kembu akmâ manbaen.

¹⁸ Aregât hin. Luâk konokņe den kom malepgât luâk hârokņe hememgât pat agion. Aregât luâk konokņe ârândâņ mando dosa bâlâk manbaengât pat agion.

¹⁹ Luâk konokgât den kokogât Anutuņe nenekmâ dosa luâk dâm nengonlep. Hainagâk luâk konokgât den loko lokogât amâ Anutuņe nenekmâ dosa luâk bo dâm nengonlep.

²⁰ Akto den kârikņe amâ bâleņande sambeleâkgât tânâmņân miawakto ekbaengât. Dâ bâleņande sambelem miawakmâ âgâambo ainâk Anutugât han kalem arekņe sambelem ewangim âgâep.

²¹ Dâ aregât luâk âmbâle agak meme bâleņe akmâ manbiâ momo dondâ arekņe meyekto gayi. Gârâmâ luâk âmbâle bikņande Yesu Kristo Hu-

monenñe yâkgât akmâ nânğanmâ manmaen nen Anutugât han kalemñe damunnenñe akmâ dosa bâlâk menenekmâ manman kârikjân katnenekbiap. Are âmâ Kristo Kembunnenñe yâkgât akmâ miawakbiap.

6

Yesugâlân dewatiyion.

¹ Aregât gain dâweren? Anutugât han kalemñe miawakmâ sambelem ariwiapgât bâleñe aktenñe ârândân akbiap. Hain dâweren mon?

² Hain bo. Bâleñaet akmâ moyion nenñe gain gain gaetñe bâleñe lâuwânje akmâ manmaen?

³ Aregât ye hin bo nânğai mon? Nen tu पुलिनंगियान âmâ Yesu Kristogâlân dewatiyion. Dewatim âmâ yâkgât momoân dewatiyion.

⁴ Hain akmâ dewatienñe âmâ Kristo olop han nenguep. Hain akto Eweñe Anutu yâkgât pagalenande Kristo mem agato momoñânba agalep hain agâk nen golâ akmâ manman irakñe ain manbaen.

⁵ Aregât lâuwânje makbe. Anutunje nanñe moep aregât pat nengiep. Hain nengim âmâ Yâkgâlân dewatinenegep. Aregât akmâ Yesunje momoñânba agalep dop hainâk mem agatnenekbiap.

⁶ Aregât hin nânğamaen. Han tâmbânje nenñe Yesu olop lâwinân moep dop hainâk bâleñenennje bo agâkgât miawagep. Hain miawakto bâleñe nenñande bo damunnenñe akbiapgât dâp miawagep.

⁷ Amâ hingât luâk siâ mondo âmâ bâleñande lâuwânje bo damunñe akbiap.

⁸ Akto nen âmâ Kristo olop moyion aregât yâk momonânba agatmâ manmâ âgâwiapgât nen âkâ yâk olop manmâ âgâwaen. Hain nângâmaen.

⁹ Akto Kristogât hin nângâmaen. Yâk momonân ba agalepgât lâuwânje bo mombiap. Akto momogât pat arekne lâuwânje bo damunne akbiap. Bo.

¹⁰ Yâk moep amâ bâleñaet sop konok mondo bo agep are. Akto hinne mandâp amâ Anutugât akmâ mandâp.

¹¹ Aregât ye hainâgâk bâleneyeñaet pat moyigât Yesu Kristo yâk olop Anutugât akmâ manmâ âgâniâm dâwei.

¹² Aregât bâleñande hâkyeje damunne akbopgât nângâmâk manbei. Akto hâkyeñande egâlian bâleñaet hâwâtyekbopgât are gai nângâmâk biwiyenje damunne akmâ manbei.

¹³ Hain akmâ hâkyeñande bâleñaet pat hon bawa bo aganbiapgât hin akbei. Anutunje momonânba oloñ yekmâ manman âlepñân katyegepgât hâk biwiyenje Anutugât kotgâm wanbiâ âlepñaet hon manbiâp.

¹⁴ Amâ hingât. Ye den kârikñande bo damunyeje akmâ denân katyekmap. Bo. Anutugât han kalemñande damunyeje akmapgât bâleñande luâk kembu bo akyenjiwiâp.

Agak meme âlepne aregât hon bawa aganmaen.

¹⁵ Aregât ire gain akbaen? Anutugât han kalemân manmâ arienne den kârikñaet horat hulaj agepgât bâleje mendenne ârândân akbiap mon? Amâ bo.

¹⁶ Luâk kembu siâ han biwiyenande hikom kinmâ lau lokoanbaije yâkgât hon aganmâ âi

meanbai. Bâleñande damunyeñe akto aregât hoñ manañmâ ageine mom hilip aguwâi me lau loko lokoñe damunyeñe akto yâkgât hoñ manmâ âgâmbiâ Anutuñe yekto huraguwiâp. Are nângâi mon?

¹⁷ Ye bâleñæet hoñ manmâ gayi are bo agep. Dâ luâk bikñande Yesugât keñe makyenjimbiâ âmâ pâñân mem han yeñande nângâm kepilâm lokomai aregât Anutu mepaiñe meanbaen.

¹⁸ Dosa yeñande wârakmâ mem ge katyekto aregât hoñ bawa akmâ mali are Anutuñe kom mem oloñyekmâ agak meme âlepñân katyekto aregât hoñ bawa agañi.

¹⁹ Han tâmbâñe yeñe yeukñe aregât luâgân siâ me siâ yendâp aregât dop katmâ makyenjiân. Ye ulikñân hâk biwiyeñe egâlian bâleñe aregât hoñ agañbiâ humo akto gulip mali. Aregât sop unjak âmâ hâk biwiyeñe ârândânġât hoñ bawa agañbiâ humo akto han ârândânġak akmâ manbei.

²⁰ Ulikñân bâleñæet hoñ maliân ain ârândânġ man-mangât horat are bo yeyenġiep.

²¹ Akto sop ain wan bunñe miawakyenġiep? Bo. Aregât kakñân momo miawak yeñgiwiapġât pat. Dâ hinñe are nângâm âmâ anunñe olowâk mandâi.

²² Bâin. Sop hinñe amâ bâleñæet tâk hulañdo Anu-tugât hoñ manman agi mandâi. Hain akbiâ han irakñe akto agak meme ârândânġ miawak yeñġiep. Dâ beirâ âmâ manman kârikñe mem manbai.

²³ Bâleñæet hâuñe âmâ momo membaen. Dâ Anutuñe han kalemñæet akmâ Kembu nenñe Yesu Kristo yâkgât akmâ manman kârikñe nengimbo mem manmaen.

7

Yesu moepgât den kârikjaet tâk hâreaņep.

¹ Galama, den kârikjaet keiņe nâņgâmai ye hin makyengiwe. Ye hin bo nâņgâmai mon? Nen mandenņe den kârikņe arekņe damun nenņe akmap. Dâ mombaenân âmâ den kârikņe arekņe bo damun nenņe akbiap.

² Aregât âmbâle siâņe luâk siâ mendoân den kârikņe hin kalaņep, luâk hepunbiapgât dop bo yendâp. Dâ luâkņe mondo den kârikņe makmâ hâreaņep are hepunbiapgât dâp talaņbiap.

³ Aregât luâkņe golâ mandoân ain âmâ hepunmâ luâk siâ mendo âmâ âmbâle bâleņe dâm konmaen. Dâ luâkņe mondo âmâ luâkdâ âmbendâ menduyelegep tâk are hâreaņep. Aregât luâk siâ membiawân ain mem hepun hepongât dosa bo membiap.

⁴ Galama yengât keiyenņe hainâk yendâp. Kristogât hâkņe mondo ain den kârikņe aregât tâk hâriep. Hârembo den kârikjaet moyi. Are amâ ambo siâgât agi. Anutuņe nanņe momoņânba agalep mandâp yâkgât kâmot agi. Aregât nen Anutu bunņe peniaņiongât.

⁵ Dâ ulikņân manman tâmbâņe malion sop ain den kârikņe arekņe egâlian bâleņe kâlâpņe waito hâk biwinenņân âiņe mem malep. Hain aknengimbo momogât bunņe mem peniaņion.

⁶ Dâ hinņe amâ den kârikņe arekņe bo damun nenņe akmap aregât tâkņe hulaņ nengiewân amâ den kulemgât dâp tâmbâņe bo watmâ âmâ Heakgât dâp irakņe tâlim arimaen.

Bâleņande hilip nengumap.

⁷ Aregât gain dêweren? Den kêrikne ire amâ bâleje mon? Hain bo. Den kêrikne bo tatâp dêine nâ bâlejaet keje bo nângâm kotgâwom. Den kêrikne arekne hin makmâ miawakniņdâp, “Egâlian bâleje bo nângâm egâlianben.” den are bo tatâp dêine egâlian bâleje bo nângâwom.

⁸ Gârâmâ bâleje are amâ den kêrikne arekne tân agaņdo hanne hâwâto egâlian bâleje keje keje miawakniņep. Amâ den kêrikne arekne bo yendâp dêine bâlejanaet yân limbâp agum yembop.

⁹ Nâ ulikņân den kêriknaet dâwân bo malân ain amâ manmanne miawaknengiep. Aregât hamiņân den kêrikne arekne penâniņdo bâlejanaet biwinân ai mendo momogât dâwân ariân.

¹⁰ Den kêrikne arekne manmangât dâp makmâ miawakmap arekne purik dâm momogât dâp miawakniņep.

¹¹ Amâ hingât. Bâleje are amâ den kêrikne arekne tângombo kêrikne akmâ heniņmâ nugumbo momo hinare agân.

¹² Aregât hin nângân. Den kêrikne amâ dosa bâlâk. Akto Anutuņe wan me wan makmâ hâriep den are hainâk amâ dosa bâlâk akto Anutuņe nângâmbo âlepne akto ârândâņ akmap.

¹³ Aregât hin dêwe mon? Den kêrikne amâ âlepne arekne konok nâ nugumbo momogât dâp miawakniņep mon? Hain bo. Bâlejenande den kêrikne âlepne aregât akmâ momoņe nuguep. Amâ hingât. Anutuņe wan makmâ hâriep den aregât akmâ bâlejenaet keje nângâm hengemgore bâlejaet hândâkne dondâ bâleje miawakmâ kinbiapgât.

Bâleñande hikom katnenekmap.

14 Dâ nenâmâ hin nângâmaen. Den kârikñe amâ Heakgât pat. Dâ nâmâ bâleñæet hoñ agañmâ hângât pat manman.

15 Nâ agak memene nângâwerâm aktere purik gurik agep. Amâ hin. Nâ siâ me siâ akberâre umatñe akto bo akman. Dâ siâ me siâ sârekoman are amâ akman.

16 Akto wan me wan sârikoman are akman âmâ benñe hin nângân, den kârikñe are nângâre âlepñe akmap dâman.

17 Aregât wan akmâ bâlیمان are amâ nâ nune hangât bo akman. Bâleñande hanân yem hâwâtneko akman aregât.

18 Nâ keine hin nângân. Agak meme âlepñæet egâlianman are amâ membiangât dâp bo tatniñdâp, aregât hâknân wan me wan siâ âlepñe bo yendâp. Hain nângân.

19 Amâ hin. Nâ wan me wan siâ âlepñe akbian dâm kinmâ âmâ bo akman. Dâ siâ me siâ bâleñe bo akbian dâm kinmâ âmâ akman.

20 Bâleñe bo akbian dâm makmâ hanâk akman amâ nunak bo. Bâleñe biwinân tatmap arekñe huñgunniñdo hanâk akman, hain nângân.

21 Aregât nângâlân hin miawakmap. Siâ me siâ âlepñe akberâre âmâ bâleñande mete katniñmap.

22 Nâ han biwinande Anutuñe den kârikñe kalep are nângâre ârândâñ akto herone akman.

23 Dâ hâknande âmâ nângâ nângâne are kondo gembo bâleñe hâknân manmap arekñe hiko neko umatñân mandân.

24 Aregât mesak gosak akman. Gâuk niñande hâkne momogât pat agakñe mem kotdâ nekbiap?

Amâ hin.

²⁵ Nâmâ Yesu Kristo Humo nenñe yâkgât akmâ Anutu mepainje meman. Bâin. Nâ Anutugât den kârikñe are nângâre ârândâñ akto nângâ nângânande hoñ agañman. Dâ hâknande âmâ bâleñaet kârikñe hoñ agañman.

8

Yesuñe dosanenñe puliepgât yâk nângâm kepilâ añaen.

¹ Aregât Yesu Kristo olop manmaen nen âmâ Anutuñe bâleñaet hâuñe bo makmâ kotdâ nengiwia.

² Amâ hingât Anutugât Heak arekñe Yesu Kristogât manman are nengiep pat arekñe bâleñaet tâk akto momogât tâk hâriep.

³ Akto den kârikñe are han tâmbâñe nenñande kârikñeñe kondo gembo nengâlân âi mem âsineneko bo agep. Aregât Anutuñe nanñe luâk hainare ak dâambo luâk akmâ gem mando bâleñaet akmâ nanñe kuk agaño moep.

⁴ Mondo âmâ den kârikñe loko loko âlepñe miawaknengiep. Nen han tâmbâñaet dâp bo watmaen. Bo. Amâ Heakgât dâp tâlimaen nengâlân den kârikñe loko loko âlepñe mendenñe huraguwiapgât dâp miawaknengiep.

⁵ Hâkyeñaet dâp tâlimai yâkñe âmâ hâkgât nângâmbiâ humo akmap. Dâ Heakgât dâp tâlimaen nenñe âmâ Heakgât siâ me siâ aregâlâk nângâenñe humo akmap.

⁶ Hâkgâlâk nângâm manbiâ âmâ momo miawaknyeñgimbo hilip aguwai. Dâ Heakgât

nângâenņe humo akbiap amâ manman âlepņe akto biwi sânduk membaen.

⁷ Amâ hingât. Luâk siânņe hângâlâk nângâmbo humo akmap yâkgât nângâ nângânņande Anutu gasa agañmap. Nângâ nângânņande Anutugât den kârikņæet amukņân tatbiapgât dop bo tatâpgât den kârikņe are hâkânņe akmâ panmap.

⁸ Amâ wangât? Hingât. Hâkgâlâk nângâmai yâk Anutuņe yekmâ hâkânņe akmap.

⁹ Dâ ye Romagâtņe amâ Anutugât Heakņe arekņe hanyenân tatmâ manmapgât hâkgât patņande bo damun yeņe akmap. Amâ Heak olop menduguakmâ manmaigât. Dâ siânņe Kristogât Heak bâlâk manbiapņe yâkgât pat bo mem manbiap.

¹⁰ Dâ Kristoņe hanyenân manmawân hâkyenņande bâleņæet akmâ momoņe akyenņimap gârâmâ han otne yeņande amâ dosa bâlâkgât golâ akmâ manmap.

¹¹ Akto Yesu momoņânba mem agalep Anutugât Heakņe hanyenân tatmap arekņe Kristo Yesu momoņânba mem agalep dop hainâk hanyenân Heakņe mandâp yâkgât akmâ hâkyeņe momoņe are hainagâk mem golâ katbiap.

Heakņe menenekto yâkgât agion.

¹² Galalupne, nengât hâu yendâp aregât hâknenņæet bo nângâmâk manbaen. Akto hâkgât agak meme bo mem manbaen.

¹³ Amâ ye hâkgât agak meme watmâ manbai âmâ hilip aguwai. Dâ Heakgât kârikņân agak meme are kombiâ gembo âmâ manman âlepņân manmâ âgâwai.

14 Aregât keiņe hin. Anutugât Heak arekņe sokoyekto manmai yâk âmâ Anutuņe nan barat dâm yeņgonmap.

15 Anutugât Heak yeņgiep are âmâ hoņ manmanlupņe manmâ hamep akņetgât bo. Nan barat bunņe manņetgât Heak yeņgiep. Aregât akmâ Ewenenņe âlepņe dâm konmaen.

16 Amâ nen Anutugât nan barat manden den are âmâ Heakņe biwinenņân makmâ humolembo nâņgâmaen.

17 Nanņe baratņe mandengât Anutuņe bâtņe bâiņe nengiwiapgât dop miawaknengiep gât Kristo olop mendugum damun akbaen. Amâ in hânân yâk olop dâtņe metņe kakņân manbaen âmâ âlepņe yâk olop egâlian pagaleņe âlepņân nen hârogâk manbaen.

Manman âlepņe aregât lâmgom manmaen.

18 Galalupne. Nâ hin nâņgân. Himbimân Anutuņe egâlian âlepņe nengiwiap arekņe hânân hâk hilâlâm umburuk yendâp are ewangiâp aregât hâk hilâlâmngât nâņgâenņe yânņe akbiâp.

19 Anutugât nan barat manmaen nen pagaleņe miawaknengimbo tektekņân manbaengât siâ me siâ liulep arekņe aregât imbianmâ lâmgom manmai.

20 Amâ hingât. Anutuņe siâ me siâ liulep are mom bâle bâlegât kâlegen katyegep. Are amâ yeņgât hangât bo. Anutuņe siân wan âlepņe miawakbiap aregât lâmgom manbaigât lope kâlegen katyegep.

21 Amâ hingât. Beirâ wan me wan liulep are gai mom hilipaguwaigât tâkņe guņmâ panmâ kârikņe

akmâ Anutugât nanne baratne nengâlân egâlian âlepñân dewatinenekbai. Haingât.

²² Nen aregât hin nângâmaen. Anutuñe kotne siâ siâ hârok ketuguep are hârokne âmbâleñe nanan memberâm hâk hilâlâm nângâm kamboñmai dop hainâk akmâ lâmgom manmâ kamboñmai.

²³ Akto wan me wan liulep areâk bo akmap. Nenâkai, Heakne biwinenñe bunne aknengimap Anutugât nan barat manden aregât keñe mi-awaknengiâkgât akto Anutuñe hâk nenñe mem hulañmâ heñgemgom mem tek tekñân katnenekbi-apgât sopñe lâmgom manmâ han nenñande mesak gosak akmâ umburukne akmaen.

²⁴ Hain akmâ lâmgom manmaengât amâ Anutuñe heñgem nenguwiapgât pat miawak nengiep. Dâ siâñe siâ lâmgom manbiapñe amâ wan me wan ekbiawân lâuwâñe bo lâmgom amâ biwi owâi bo akmap.

²⁵ Gârâmâ nenâmâ hinñe wan bo ekmaen are lâmgomaen amâ biwinenñe owâiñe akto bo hâkân akmaen.

Heakne tânnengumap.

²⁶ Akto dop hainâk Heakne gai nen yeukñaet akmâ tân nengumap. Nen hin me hain ulilanñdenñe ârândân akbiap are amâ bonângâm kotgâmaengât Heakne han nenñe mem owâimbo den luâkne bo nângâmaenñe are maktenñe miawakto Anutuñe nângâmap.

²⁷ Akto Anutu biwinenñân ekmapñe amâ Heakgât den nângâmap. Amâ Heakne nen Anutugât kâmot nengât akmâ Anutuñe wan

me wan makmâ hâriep are nângâmap areâkgât ulilaŋmap.

²⁸ Akto areâk bo. Nen hin nângâmaen. Anutu han nenŋande nângaŋmaen nengât akmâ wan me wan miawaknengimap are hârok mem tân nenguwiapgât mânginenekmap. Amâ yâkŋe han kalemŋaet akmâ oloŋ nenegep nengât.

²⁹ Ulikŋân Anutuŋe han kalemŋaet akmâ potatnenegep gât Nanŋaet tirip akbaengât makmâ hâriep. Akto emiŋe gariŋe biwirâ aktenŋe ikiŋe âmâ teunenŋe humo ulikŋân gâtŋe akmâ manbiapgât makmâ hâriep.

³⁰ Anutu luâk âmbâle ulikŋân nângâm heŋgemgom potat nenegepgât nengonmâ oloŋnenegep. Nengonmâ oloŋ nenegepgât dosa nenŋe bo aktâp dâep. Dosa nenŋe bo aktâp dâep gât egâliaŋ âlepŋe nengiep.

Anutugât han kalemânba siâ me siâŋe bo hilip-nenguwiap.

³¹ Den are keiŋe gain gain yendâp dâweren? Anutuŋe gala bo aknengimap dâine gasalupnennande dondâ yeukŋe aknengimbiâ hilip aguwâen.

³² Anutuŋe ikiŋe Nanŋe bo gangerâm dum-nennân kilâkgât huŋgun aŋdo giep are amâ âi humo. Dâ wan me wan yâkgât akmâ nengiwiap amâ owâiŋe.

³³ Anutuŋe ikiŋak dosa nenŋe bo aktâp dâmap aregât yâkgât kâmotlupŋe nen niŋande denân katnenekbop?

³⁴ Akto Kristo Yesu ikiŋak moep. Akmâ moewâk bo. Yâk momoŋânba agatmâ Anutugât bâtŋe bungen âgâ talepgât nengât akmâ Anutu ulilaŋmap,

aregât niñande denân katnenekto dosa nenñe mi-awakbiap?

³⁵ Akto Kristogât han kalemânba wan arekñaetñe oloñ nenekto yân manbaen? Amâ hâk hilâlâmñe me dâtñe metñande me gasalupnennñande me mop manmanñe me hanokoak manmanñe me tembe bugâñe arekñe? Are hârokñe Kristogât han kalemânba oloñnenekbiapgât dop bo.

³⁶ Amâ Anutuñe aregât magep hin tatâp,
 “Anutu gânggât akmâ hâk hilâlâm nângâenñe hokboâk hokboâk gasalupnennñande itin gulam menenekmai. Akto bau kom gâimaen aregât dop hainâk aknengimai.”

³⁷ Hain arekñe bo mem ge katnenekbiap. Bo. Yesuñe han kalem akmapgât kârigem kârikñe humo peniañmâ kinmaen.

³⁸ Aregât hin nângâm kârigeân. Momoñe me manmanñe me añeloñe me luâk kembuñe me hinñe miawakmapñe me beirâ miawakbiapñe me siâ me siâ kârikñe arekñe

³⁹ me siâ siâ âgâñe me siâ siâ gegeñe me wan me wan Anutuñe liulep arekñe Anutugât han kalemñande Yesu Kristoñe katip nengumap ain ba bo oloñnenekbiap.

9

Pauloñe Yuda luâk yengât yai nângâep.

¹ Nâ Kristogât akmâ den bunñe maktere nângâñet. Heakñe hanne mem pagalembo nângâm heñgemgom makyenñiwe.

2 Nâñe nâñgât ginbailupne Yuda gâtñe yâkgât akmâ nâñgâyeyñgire biwine umatñe dondâ akmap.

3 Aregât hin nâñgân mon? Anutuñe Yuda luâk galalupne yâkgât akmâ hepun nekmâ âmâ meyekbiap are nâñgâm owâiân.

4 Yuda luâk nengât kotnenñe siâ Israegât kâmotlupñe are Anutuñe nâñgât mândulupnerâm ikinjaet pagalenñe hekatyeyñgiep. Hain akmâ âmâ Anutu olop dewatiwaigât pat akto den kârikñe makmâ miawak yeyñgiep. Akto sumbegât emetñe aregât hin akñetgât dâpñe keñe hekatyeyñgiep. Akto siân wan me wan hârok yeyñgiwian dâm makmâ hâre yeyñgiep.

5 Dâ Yuda nengât hakulupnenñe amâ luâk kautñe mali. Akto Anutuñe nanñe huñgunanñdo giep are amâ nengât hutnenñânba miawagep. Yâk âmâ wan me wan hârok nengât kautñe malep, yâk âmâ Anutu aregât nenñe nâñganñdenñe humoñe humo kârikñe talanñbiap. A bundâk.

6 Dâ ya makyeyñgiân aregât hin bo dâwaen, “Yuda luâkñe wan akmai aregât Anutugât den yeukñe agep.” bo dâwaen. Israe gâlân ba miawagion âmâ Israe luâk bunñe hârokñe ârândânñ bo agi.

7 Dâ Abrahamgât uliklupñe miawagi are âmâ kâmotlupñe bunñe gai bo agi. Gârâmâ aregât Anutuñe makto Moseñe hin kulemgoep, “Abraham gâñgât nanñe Isakagât kâlegenlupñe amâ gâñgât pat akbai.”

8 Den aregât keñe hin tatâp. Abrahamgât kâlegen gâtñe hârok âmâ Anutuñe mândulupnerâm bo yeyñgonmap. Anutuñe makmâ hâriewân miawagi yâkñeak Abrahamgât kâlelupñe bunñe

agion.

⁹ Aregât Anutugât denje hin talep a bunje agep, “Hombaŋ kakŋân sop miawakto Sara nanaŋ mem mandoân purikatbian.”

¹⁰ Akto areâk bo. Rebeka âmâ luâkŋe hakunenŋe Isaka yâk olop manmâ nanaŋ lâuwâ megolak tepŋe agep.

¹¹ Tepŋe akto nanaŋ lâuwâ bo miawakmâ maliat ain bâleŋe me âlepŋe bo agialân Anutuŋe yâk yetgât hin magep, “Teuŋande emiŋaet hoŋ manbiâp.”

¹² Amâ Anutu ikiye hanŋaet den are kârikŋe agâk gât nâŋgâm nanaŋ manman yetŋaet bo makmâ kârigiep. Ikiyehanŋaet mem potat yelekmâ kinmâ hain magep.

¹³ Aregât Anutugât den bikŋe hin tatâp, “Nâŋe Yakobo âmâ han kalem agaŋmâ okot âlep nâŋgân. Dâ Esau âmâ hâkâŋ agaŋdân.”

¹⁴ Akto aregât gain dâweren? Anutuŋe wan me wan mendo bo ârândâŋ akmap? A borondâŋe.

¹⁵ Ulikiŋân Anutuŋe Mose hin magaŋep,

“Luâk me âmbâle siâ are okot âlep agaŋdere ârândâŋ akmap. Akto luâk me âmbâle siâ han kalem agaŋdere ârândâŋ akmap.” dâep.

¹⁶ Aregât keiŋe hin. Anutuŋe luâk hanyenjaet me âiyenjaet bo nâŋgâyengimap. Anutu ikiye han kalemŋaelâk nâŋgâm makmâ potat nenekmap.

¹⁷ Aregât keiŋe Anutugât denŋande Parao hin magaŋep, “Nâ gâŋgâlân kârikŋene mem miap pandere hân ârândâŋ ariâkgât dâm kat gegân.”

¹⁸ Aregât Anutuŋe âmâ luâk siâ han kalem agaŋberâm âmâ âlepŋe agaŋbiap. Dâ luâk siâ han

biwiņe gisapkoanberâm âmâ âlepņe gisapkoanbiap.
Amâ ârândân akmap.

Yuda luâkņe Anutu hamiaņi.

¹⁹ Are oyaņmâ yeņgâlân gâtņe siâņe hin makniņbiap mon? “Anutuņe wan me wan akberâm dâmbo luâkņe bo miawagâk gât horat kalaņbiapgât dop bo tatâp aregât Anutuņe luâk nengât nâņgâmbo bâlimap are bo ârândân aktâp.” dâm makniņbiap mon?

²⁰ Wei gâmâ luâgâk. Wangât Anutu den hâuņe maganbiat? Aregât den dopņe hin makbe. Wangât umbâņe luâk umbâ mângimap are hin maganbop, “Gâ wangât tiripne hain are mânginegen?”

²¹ Aregât umbâ mângimap luâk arekņe hân numņe mem umbâ bikņe luâk yâk yeņgât pat mângiwop. Dâ bikņe dua bau yâk yeņgât mângimbo ârândân akbiap.

²² Amâ Anutuņe kuk akto kârikņeņe tekteknân kato ekbaigât umbâ bikņe hogom panyekbiapgât nâņgâyeņgim bo hâkâņ akyeņgiep.

²³ Hain akyeņgim umbâ bikņe han kalamņaet pat maleine beirâ egâlian pagalenân kâmot katnenegâk gât nâņgâmbo yendâp. Umbâ are nengâlân egâlian unsambe nengiepgât menenemâ manmap.

²⁴ Dâ aregât âmâ Yuda luâk âmbâleâk bo. Hân siâ siâ Yuda luâk bo manmai aregât nen han kalemņaet pat aknegât oloņ nenegep.

²⁵ Akto Anutuņe propete Hosea hin maganđo kulengoep,

“Luâk kâmot ambo bo akyeņgiân yâk nâņgât luâk âmbâlelupne yeņgonmâ makyeņgiwan. Akto

âmbâle okot han kalemņe bâlâk malep yâk nâņgât dâtâne dâm konbian.”

²⁶ Akto den siâ hin,

“Nâņe ye nâņgât luâk âmbâlelupne bo dâm makyenġiân ain kotyeņe Anutu manman amboņaet nanne baratne yeņgonbian.” dâep.

²⁷⁻²⁸ Dâ areâk bo. Yesaianġe Israegât hin magep, Kembuņe hânân denņaet bunņe dowâgâk mem miap pando kârige wiap aregât Anutuņe hin dâep, “Israegât kâlelupņe haruân nupi yendâp aregât dop miawakmâ manbai nâņe hutņânba konok konok mem oloņyektere manman âlepņân manbai.” dâep.

²⁹ Akto Yesaianġe beirâ miawakbiapgât hin magep,

“Humonenņe kâmot kârikņe Humo Amboyeņande hutnenņânba konok konok bo oloņ nenekto dâine âmâ Sodom Gomora itiņ gulam agiat hain are akbâen.”

Yuda luâkņe âlepņe aknegât ewum hâumġoyi.

³⁰ Aregât ire gain dâweren? Hin mon? Luâk Anutugât kotņe bonâņġâmaiņe âlepņe akņetġât bo nâņġâmâk watmâ manmai yâk âlepņe manmaigât memai. Are âmâ Kristo nâņġaņmaigât memai.

³¹ Dâ Israe luâk den kârikņe lokom kinbiâ Anutuņe yekto huraguâkġât kârikņe agi. Kârikņe akmâ den kârikņe bo lokom âlepņe bo akmâ âmâ umale agi.

³² Amâ wangât? Hingât. Yuda luâk âmbâle arekņe Kristo nâņġâ aņbaigât pat bo wali. Yân agak memeyenġe aregât âlepņe aknegât hain agi. Are

amâ dâwân kât yiep ain keiyenje kondo kâwâwân kârâyi.

³³ Aregât Anutuņe hin makto Yesaianje kulemgoep,

“Nângâi. Nâ Sionj gimbânân kât siâ katere tatbiap. Arekņe keiyenje erâambo peņ panyekbiap. Akto kât humo katberân ain kom hewewen panbai. Dâ siâņe nânğanbiap âmâ bo pâpkom anjun angiwiap.”

10

Yuda luâkņe Anutugât den hâkâņe dâyi.

¹ Galama, nânġât kâmot Yuda luâk âmâle are Anutuņe meyekbiapgât hannande dondâ hâwât nekto Anutu areġât ulilanman.

² Amâ yâkņe Anutugât âi mendenņe huraguâk dâm kârikņe akmâ manmai. Dâ amâ pâpkom kinmâ akmai.

³ Yâkņe Anutugâlân ba dosa bâlâk aknegât dâp yendâp areġât pâpkomai ġât yeņeak âlepņe aknegât âiņe kârikņe memai. Hain akmâ Anutuņe yekto huraguâk ġât dâp hâkâņ akmai.

⁴ Aregât keiņe hin. Kristoņe den kârikņe are lokombo bo agep. Aregât luâk âmâle siânbaņe Kristo nânğanbiâ âmâ Anutuņe dosayeņe bo dâm yeņgonmap.

⁵ Aregât Moseņe hin kulemgoep, “Luâk siâ den kârikņe are hârok lokore Anutuņe nekto huraguâk ġât manbiap yâkņe den kârikņe hârok lokombo âmâ âlepņe manmanân manbiap.”

⁶ Dâ Kristo nânğanbiâ Anutuņe yekto huragumap ġât den hin yendâp, “Niņande himbimân âġâm Kristo mem olonġo gewiap?”

⁷ Me niñande hememân gem Kristo momoņe yâk yenġât hutyenânba oloņdo gawiap? Ye hain bo dâwai.”

⁸ Anutuņe magep hin tatâp, “Anutugât denņe kâlewângen bo tatâp. Enemân akto biwigân yendâp.” Are amâ biwi kat katġât den pat âlepņe nânġâņetġât makyenġimaen.

⁹ Amâ Yesu amâ Kembune dâwiat akto biwigân Anutuņe Yesu momoņânba mem agalep dâm nânġâm kepilâwiat benņe Anutuņe henġem gugumbo manman âlepņân manbiat.

¹⁰ Aregât han nenņande Yesu nânġaņmâ âmâ dosa bâlâk manmaen. Akto launenņande makmâ miap panmâ mandenņe Anutuņe henġem nengumap.

¹¹ Aregât Anutugât denņande hin dâep, “Siâņe nânġaņbiap âmâ bo pâpkom aņun aņgiwiap.”

¹² Amâ Yuda me Girik luâk potat potat bo yendâp. Humo Kembu konokņe amâ hârokgât Kembunenņe mandâp. Yâkņe luâk me âmbâle bikņande yâkġât kotņe konbiâ âmâ ainâk han kalem akyenġim wan me wan âlepņe potatmâ yenġiwiap.

¹³ Aregât Anutugât denņande hin dâep, “Niņe me niņe Kembu kondo âmâ ainâk Anutuņe mem henġemgo aņbiap.”

¹⁴ Gârâmâ luâk âmbâleņe amâ Kristo bo nânġaņmai amâ gain gain kotņe konbai? Akto siâņe Kristogât keiņe bo makyenġimbo âmâ gain gain nânġaņbai? Akto den pat âlepņe makmaen nengâlân ġâtņe konokņe bo arim makyenġimbo âmâ gain gain den pat âlepņe nânġâwai?

¹⁵ Akto Anutuņe bo huņġunaņdo âmâ gain gain

arim makyenğiwiap? Anutuñe makto siñe hin kulengoep, “Pat âlep den makmak luâk togombiâ âmâ, munñande han nângâ nângânenne mem owâimap.”

Anutuñe Yuda luâk âmbâle yenğondo bo nângañi.

16 Den pat âlepñe ire amâ luâk hârokñe bo nângañmâ bunñerâm kepilâyi aregât Yesaianje hin magep, “Kembu, den pat âlepñe makmâ miawaktenñe siñe bo nângañmâ kârigiep.” dâep.

17 Aregât hin nângâweren. Siñe Kristogât pat makyenğimbo den bunñe nângâmaen. Akto den bunñe nângâenne amâ biwi kat katgât miawakmap.

18 Gârâmâ aregât hin aiyenğuan. Luâk âmbâle amâ den pat âlepñe are bo nângâyi mon? Hain bo. Anutuñe makto siñe hin kulengoep.

Denyenñande hânñe hânñe sambelem ârândân agep. Akto den lauyenñande hân tunğunğangen ârândân agep.

19 Aregât gaetñe hin aiyenğuan, Israe luâk bo nângâm henğemgoyi mon? Hain bo. Ulikñân Mosenje hin kulengoep,

“Anutuñe hin dâep, Nâñe luâk yânñe meyektere ye ewangiyekbiâ nângâmbiâ bâliwiap. Akto luâk kâmot bo nângâ niñbai are olonyektere yekmâ biwiyeñe kâlâp akbiap.” dâm kulengoep.

20 Akto beirâ Yesaianje den umatñe mem gem makmâ âmâ bo añun añgim hin dâep,

“Anutuñe hin dâep, Bo kulâgât nekmâ maliñe penâniñi. Nângât bo makmâ mali yâk yenğât mete katyenğian.” dâep.

21 Hain akmâ Yesaianje Israe luâk yâk yengât hin makmâ kulengoep,
 “Anutuñe hin dâep, Nâ luâk kâmot nângâm gulip agakñe akto den kokoñe sop kâlep ganjet dâm yengonmâ mandere bo togoyi dâep.” dâm kulengoep.

11

Anutuñe Yuda luâk bikñeâk ikiñeet pat meyegep.

¹ Aregât nâ hin aiyenguân, Anutuñe Yuda luâk hârok hepunnenegep mon? Bo. Hain bo agep. Amâ nâkai Israe gâtñe manmâ gan. Akto hakune amâ Abraham. Akto nâmâ Bensamiñ kâmolân gâtñe mandân.

² Anutuñe Israe bo hepun nenegep amâ hingât. Ulikñân luâk nângâyengim potatyegep amâ bo hepun yekmap. Amâ ye Anutugât denñe are bo oyañmâ nângâmai mon? Elianje Israe luâk yâk yengât akmâ Anutu hin dâm magañep,

³ “Kembu, Israe luâkñe propete yengum âmâ sumbe kat katgât are patakom itin gulam meyi. Dâ nuneâk mandere gai nuguwerâm aktâi.”

⁴ Hain dâmbo den hâuñe gain purikalanjep? Hin. “Nâ luâk 7,000 koratyengure lâpio kotñe Baali yâkgât bo kângoañi.”

⁵ Anutuñe hain dâepgât hin nângâne. Anutuñe han kalem akmâ Yuda luâk bikñe mem kepilâ yegepgât mandâi.

⁶ Aregât Anutuñe han kalemñaet akyengiep. Akyengiep gât âmâ agak meme yeñaet bo akyengiep. Hain bo akto dâine âmâ han kalemñe bunñe bo akbop.

⁷ Akto gain gain nângâweren? Israe luâk yâkņe Anutuņe nenekto huraguâkgât kulâgâtâmâ âi humo meyi, are bo mem miawagi. Dâ Anutuņe mem kepilâ yegep yâkņe âmâ meyi. Bikņe humo âmâ Anutuņe makto biwiyenę kârik agi.

⁸ Aregât Anutugât denņân hin tatâp,

“Anutuņe han yeņe mem gâlikoep. Akto dewunyeņe gai mem limbâpkoep. Akto ondopyenę mem gisapkoep. Gisapkombo gam gam maleine uņak hainâk yu mandâi.

⁹ Akto Dawidiņe hin dêep,

“Anutu, gâņe makmenâ sot nem tatbiân âmâ sot akto kat katyenęande lâlâmbâlân dowâk peņ panmâ yeņguâk. Akto wan me wan agigât hâuņe hân dâpņân gewai hainare miawakyeņgiwiapgât makmenâ miawagâk.

¹⁰ Gâ dewunyeņe mem limbâp komenâ dewun bok akbai. Dâ hamiyenę mem goņgoņgomenâ pâit pâitņe akmâ manmâ âgâwei.” kulemgoep.

Anutuņe kâmot siân gâtņe ikinęaet pat meyegep.

¹¹ Akto hin aiyenęuân. Israe luâk yâkņe mokmok mem peņ panmâ mom bo akbaigât hain miawagep mon? Hain bo. Israe luâkņe bâleņe agigât Anutuņe Israe gâtņe bo manmai meyegep. Meyekto âmâ beirâ Israe gâtņande Israe gâtņe bo manmai manman âlepņân manmai are yekbiâ bâliwiapgât.

¹² Akto Israe luâk âmbâle bâleņe agi aregât den pat âlepņe hânņe hânņe ârândâņ arim metiep. Akto Israe luâk âmbâle yeukņe akbiâ Anutugât pat bo miawakyeņgiep gât Yuda luâk bo manmai yâk yeņgâlân den bunņe peniyenęiep. Yei, maleine

Anutuŋe Yuda luâk hârok meyekbiawân âmâ hârok bunŋe miawaknengiwiap.

¹³⁻¹⁴ Galalupne, hinŋe Yuda luâk bo manmai ye den ire makyenŋire nânŋâŋet. Nânŋât kâmot hâwât yektere bikŋande nâ watnekmâ âlepŋe akŋetgât Yuda luâk bo manmai yenŋât Aposolo manman. Akto âine egâlian kakŋân meman.

¹⁵ Akto Anutuŋe Israe luâk hepunyegep gât âmâ Anutuŋe hân ârândânŋan manmai yâk meyegep. Arekŋe Israe luâk meyekbiawân amâ momoŋân ba golâ manbaengât miawakbiap.

¹⁶ Akto sot ulikŋe Anutuŋe waŋdenŋe mendâp benŋe sot hârok ârândânŋ akmap. Dâ lâwin kândârânŋande ârândânŋ yendo gai bât bâtŋe gai hainâgâk ârândânŋ yembiap.

¹⁷ Den ginŋe siâ hin makbe. Anutuŋe bât bâtŋe bikŋe hârem panmâ aregât welamŋân oliwa pâloŋânŋen miawagep aregât bâtŋe gâ Yuda luâk bo manmat oliwagât tuŋe membiatgât katgekmâ dewatigegep.

¹⁸ Aregât gâŋe lâwin bât bâtŋe tâmbâŋe Yuda luâk yâk bo nânŋâyenŋimenâ gembo âmâ agat agat bo akben. Hain akbâtgât hin nânŋâwen. Gâ lâwin kândârânŋe are bo damunŋe akmâ henŋemgomat. Kândârânŋe Yuda luâk arekŋe ge tân gugumai.

¹⁹ Gârâmâ hin dâwerât mon? Anutuŋe nânŋât akmâ katmâ dewatinegâk gât bât bâtŋe tâmbâŋe are liŋgâtmâ palep. Panmâ nâ dâgâm dewati-negep.

²⁰ Gâ Yuda luâk bo manmat amâ bundâk maktât. Anutuŋe Yuda luâk manmai arekŋe bonânŋaŋi gât hârem panyegep. Dâ gâmâ Anutuŋe nânŋaŋmatgât kindât aregât hâkge bo mem agatmâ âmâ kânŋom

manben.

²¹ Amâ Anutuņe oliwa ikiye bāt bātņe bo yai-goepgāt gā hainâgāk bo yaiguguwiap.

²² Aregāt gā han kalemgāt akto Anutuņe hâmbiņ yekmapgāt bo nelâmgiņbiap. Hâmbiņ yegepgāt den bunņe hamiaņi yâk yeņgâlân hâuņe miawagep. Dâ han kalemņaet bunņe are âmâ gâņgâlân emelâk miawagep. Aregāt gā yâkgāt han kalemņaet akmâ nâņgaņmâ manmenâ bunņe âlepņe miawakbiâp. Dâ hain bo akmenâ âmâ gā gai hârem pan gekbiap.

²³ Akto bāt bātņe tâmbâņe yâkņe biwi kârikyenjaet hepunbaiân Anutuņe lâuwâņe dewatim katyekbiap gāt kârikņe talaņdâpgāt meyekmâ dewatim katyekto ârândâņ akbiap.

²⁴ Akto Anutuņe oliwa kâit mengekâm oliwa emesa lâwinņân dopyeņe bo tatâp ain katmâ dewatim katgegepgāt bo pâpkomap. Aregāt oliwa emesa ikiye bāt bātņe gaetņe mem dewatiyekbiapgāt âmâ âiņe owâiņe akbiap.

Anutuņe Yuda luâk han kalem akyeņgiwiapgât keiņe.

²⁵ Galalupne, ye yeņaet nângâ nâņgâyeņe nâņgâmbiâ humo akbopgāt den iregāt keiņe makyeņgiwe. Anutuņe Israe luâk bikņe han biwiyeņe gisapkoep. Gisapkombo âmâ beirâ Yuda luâk âmbâle bo manmai dondâ Kristogâlân dewatimbiâ âmâ

²⁶ âlepņe Anutuņe Israe luâk kâmot hârok meyekto âlepņe akmâ metewai. Aregāt den Anutuņe makto Yesaianę hin kulempgoep,

“Sion gimbânânba luâk siânje hejngemgom nengiwiape miawakmâ Yakobo gâlânba gagap higenje hambuje uruto ariwiap.

²⁷ Hain akto nâ bâleje yeje puliwianân ain nâ olop manbaigât makmâ hâreyengiwan.”

²⁸ Israe luâkne amâ Yuda gâtne bo manmai yâk yengât akmâ pat âlep dengât gasa manmai. Dâ Anutuje ikinje han kalemjaet akmâ kepilâ yekbiapgât akto hakulupnenne yâk yengât akmâ okot âlep dondâ akyengimap.

²⁹ Amâ Anutuje wan me wan nengimap are akto oloj nenekmap aregât pat bo hilipkombo yeukne akmap.

³⁰ Ye uliknân den koko akmâ mali akto Israe luâk yâkne gai den koko akmâ mali aregât Anutuje ye han kalem akmâ meyegep.

³¹ Hainâgâk Yuda luâk yâkne han kârik akmâ den koko akmâ manmâ gayi Anutuje ye han kalem akyengiep gât yâk gai hain kalem akyengiwiap.

³² Anutuje luâk hârok den konogân manmai dâm nângâm hejngemgoep aregât luâk hârok oloj nenekmâ han kalemjân katnenegep.

Anutu humo yâk konok mepaije membaen.

³³ Yei Anutugât han kalem unsambe akto nângâ nângâne humo agat agatne talanmap aregât bätgumne pikmâ yeanmap. Yâkne makmâ kepilâ kepilâ akto makmâ kotgâ kotgâjaet keije luâkne bo nângâwâen. Dâ âi memenjaet dâp are gai luâkne bo ekmâ hejngemgomaen.

³⁴ Kembugât hannân den yendâp, are luâk niñande nângâep? Dâ Kembuje den makmâ kindo ain niñande dengât tângom magep?

35 Dâ niñande wan me wan Anutu wañdo ârândân agepgât hâu are kutigilañbiap?

36 Amâ siâ me siâ hârok yâkgâlânba togomap. Akto yâkñe wan me wan ketugumbo ârândân akmap. Akto yâkñe hârok damunñe akmap. Aregât egâlian pagalenñe yâkgâlân dewatim dewatim yem âgâwiap. A bundâk.

12

Hâknennande Anutugât sumbe akbiâp.

1 Aregât galalupne nâ Anutugât han kalemñaet akmâ den sami makyengire nângâñet. Ye hâkyenñe Anutugât sumbe golâ kotgâm wañbiâ nângâmbo âlepñe ârândân akto ekto huraguwiâp. Hain akbai amâ Anutu hoñ manman bunñe manañniâm.

2 Akto agak memeyenñe hângâlâk nângâm manmai dop are bo akbiâp. Anutunñe hanyenñe nângâ nângâyenñe mem purikatberâmbo owâi akmâ nângâmbiâ humo agâkgât Anutugât han âlepñe ârândân are miawakyekto ekmâ egâlianbei.

3 Anutunñe han kalem niñep gât ye hârok makyengire nângâñet. Siânñe ikinjaet nângâmbo âgâ âgânñe bo akbiâp. Anutunñe den dâtânñe wañdo nângañdo dop areâk akbiâp. Amâ ikinjaet nângâmbo humo bo akbiâp.

4 Amâ hin nângâñet. Hâk pâñnenñe amâ konok. Dâ kei bâtnenñe biwirânñe âi keiñe keiñe memai.

5 Aregât dop hainâk nen amâ dondâ dewatienñe hâk pâñ nenñe konok aktâp. Aregât kei bâtnñe tân agu agu akmaen.

6 Anutunñe wan me wan keiñe keiñe han kalemñaet akmâ nengiep are ârândân tatnengiep.

Aregât dopņân âi meniâm. Aregât Anutuņe den lau makmâ miawakbiapgât Anutu nânġaņmaengât dopņân makmâ miawakbaen.

⁷ Anutuņe hoņ manman âi nengiep amâ âi are kârikņe akmâ owâiņeâk akmâ membaen. Siâņe Anutugât den makmâ kepikmâ makyenġimap amâ âi are membiâp.

⁸ Biwiyenġe gewop gât den sami makmap yâk aregât kârikņe yeandâpgât makbiâp. Dâ luâk siâņe âmâ galalupņe wan me wan yenġiwerâm âmâ hâuņaet bo nânġâm yân han kalem akmâ yenġiwiâp. Dâ luâk siâņe Yesugât puligât damunņe akmâ luâk âmbâle umburuk yenġiwerâm âmâ biwi owâiņeâk akmâ dowâk tânyenġuwiâp. Bikņe kundatdâņe umatņânâk manmai are siâņe okot nânġaņmâ tângowerâm âmâ mâru guru kakņân tângowiâp.

Han kalemgât den.

⁹ Han kalem agak are hâkņeak bo akbei. Siâ me siâ bâleņaet hâkâņ yekbiâp. Dâ siâ me siâ âlepņaet âmâ egâlianġbei.

¹⁰ Ye gala agak bunņe akmâ han aņġi goaņġi akņetgât kârikņe akbei.

¹¹ Konam bâlâk kârikņeâk manbei. Biwi yenġande owâiâkgât damungom manbei. Kembunenņe hoņ bawa agaņbei.

¹² Anutuņe wan me wan katyenġiep aregât nânġâm egâlianġmâ manbei. Dâ hâk hilâlâm kakņân manmâ âmâ bo hâkâņ akmâ manbei. Akto hokboâk hokboâk Anutu ulilaņmâ dewatim mem manbai.

13 Kristogât luâklupņe umburuk manbai âmâ dowâk wan me wan bo talanņbiap are wanņbei. Akto lombo togombiâ âmâ dowâk owâiņeâk gala akyeņgiwei.

14 Bikņande yengum watyekbiâ âmâ yâk yengât akmâ Anutu ulilaņbei. Sait den bo makyeņgiwei.

15 Bikņande heroņe maroņe manbiâ âmâ yâk olop heroņe maroņe akmâ tân yenguwai. Dâ bikņande indem tâgâiak akbiâ âmâ are tânyengum olop indewei.

16 Hanyeņe mendugum kinmâ siâ me siâ konokgât han kalem akmâ manbei. Yeņaet nâņgâmbiâ dondâ bo âgâwiâp. Nen gegeņe dâmai are dowâk tânyengum maņganyekbei.

17 Siâņe bâleņe akyeņgimbo âmâ bâleņe bo agaņbei. Dâ luâk âmbâle hârokņe wan nâņgâmbiâ ârândâņ akbiap âmâ areâk nâņgâmâk manbei.

18 Ye han kau kau akmâ luâk âmbâle hârok gala akyeņgim manbei. Amâ bikņande hâkâņgiņbiâ âmâ hanâk dosane bâlâk manbe dâm gala akyeņgiwei.

19 Galama, bikņande kuk heņgân akyeņgimbiâ âmâ dosayeņe yeņeak bo makmâ hâreaņgim manbei. Kemuņe kuk are hâuņe meâkgât lâmgom manbei. Aregât Anutugât denņande hin dâep, “Dosa kotgâ kotgâgât âi amâ nâņgât. Aregât dosayeņe mem hâuņe yeņgiwian.” dâep.

20 Gârâmâ ye hin akbei. Gasagande sotgât momberân dâmbo sot wanņben. Tugât nâņgâm dâmbo tu wanņben. Gâ hain akmâ âmâ kâlâp kautņân katbiat dop hainare miawakyeņgiwiap.

21 Bâleņande gâ bo mem ge katbiâp. Aregât gâ siâ me siâ âlepņe akmâ bâleņe aregât kârikņe komenâ

gewiâp.

13

Kiap gawaman yengât den.

¹ Humomolupnenne, kiap, gawaman akto kaunsoli âmâ Anutu konok arekne luâk nengât damunnenne manbeigât katyegep aregât nen hârok yâk yengât den lokoenne ârândân agâk.

² Aregât luâk siâne gawaman yâk yengât den kom âmâ Anutugât den gai kombiap. Hain akbai âmâ hâuñe membai.

³ Amâ hingât. Humomolupnenñande amâ agak meme âlepne bo mem ge katmai. Dâ agak meme bâleñe aregât hâuñe yengimbiâ hamewakmâ manmai. Aregât gâñe humomolupnenne yengât akmâ hamep bâlâk manberâm kinmâ siâ me siâ ârândân akben. Siâ me siâ ârândân akmenâ gângât nâñgâmbiâ ârândân akbiâp.

⁴ Gawaman nenñe amâ Anutugât hoñ bawa manmâ tân gugumbiâ âlepne manbiatgât âi memai. Gârâmâ gâ bâleñe akmâ membiat âmâ hamewakben. Yâk bugâ hanâk bo konmai. Bo. Yâk âmâ Anutugât hoñ bawa manmai aregât bâleñe meme luâk yâk yengâlân Anutugât kuk miawakyenñiâp dâm âi mem kinmâ hâuñe yengiwai.

⁵ Aregât den lauyene lokom henngemgoweï. Are âmâ Anutuñe hâuñe nengiwiapgât hamep gâlâk bo. Amâ guge hangande mokmok membopgât hangande kau kau akbiâp.

⁶ Anutuñe damun âi damunyenñe agep are memaigât yenñe gawaman puli dâtânñe are yengimai.

⁷ Aregât yeŋe yâk wan makmâ hâreyi are ârândân yeŋiwei. Puligât dâtâŋe magi are dopŋân puli yeŋiwei. Dâ hoŋ manmangât dâtâŋe makmâ hâreyi âmâ hoŋ manyeŋiwei. Kânŋo nenginet dâm hâreyi âmâ hainakmâ akyeŋiwei. Lau nenŋe lokowei dâm hâreyi âmâ lau yeŋe lokowei.

Gala konok mannegât den.

⁸ Akto siâ me siâgât hâu are dowâk kotgâmbiâ bo akbiâp. Dâ hâu konok tatyeŋiwiâp amâ hin, han kalem akmâ okot aŋgi goaŋgi akŋetgât membiâ bo bo akbiâp. Aregât han aŋgi goaŋgi olop manmapŋe âmâ den kârikŋe lokomapgât dop akmap.

⁹ Anutugât denŋande hin maktâp, “Luâkdâ âmbendâgât pat bo hârewen. Gâ bugâ bo komben. Gâ kâmbu bo memben. Gala siâgât siâ me siâ are nâŋgât bo dâwen.” Den kârikŋe aregât bikŋe hârok mendugum kautŋe konok katmâ hin dâep, “Gâ guge tân agumat dop hainâk luâk siâ tângowen.”

¹⁰ Han aŋgi goaŋgi olop manbiapŋe âmâ galaŋe bâleŋe bo agaŋbiap. Aregât han kalem akmâ okot âlep akyeŋiwaen âmâ den kârikŋe hârok lokowaengât dop miawakbiap.

Pagaleŋân manbaen.

¹¹ Akto hain akŋetgât sop iregât keiŋe nâŋgâi. Nen ulikŋân Kristo nâŋgaŋdenŋe henŋem nen-guwiapgât dâp miawaktâp. Dâ hinŋe henŋem nengum metewiapgât sop ewumâk aktâp. Aregât asinânba golâ akmâ agatbei.

¹² Hândâk pipiŋe akto emet haunberâmŋât hândâkgât siâ me siâ guŋmâ panmâ âmâ pagaleŋaet tembe mâron meakmâ manbaen.

¹³ Yanep pagalenjân manmaenne ârândânâk manniâm. Are amâ sot sonjo nem munej bo akbaen. Akto tu kârikne nem gulip bo akbaen. Akto agak meme bâlene anjun olowâk are bo mem manbaen. Me gasa akmâ bo potalakbaen. Me siâgât nângâenne bo bâliwiâp.

¹⁴ Gârâmâ Kembu Yesu Kristo yâk luguakmâ âmâ benne hâkyenande egâlian bâlene penianjbopgât nângâmâk nângâmâk manbei.

14

Galagât nângâmbiâ bo gewiâp.

¹ Galalupne, luâk âmbâle bikjande Kristo getegâk nânganmai are dowâk gala akyengiwei. Amâ galagât heyengiennje penânengimbiâ ain nângâ nângâyenje gewiapgât papalakmâ manbaengât bo.

² Luâk siâ biwi kat kat kârikne talañmapne âmâ sot hârok hanâk nemap. Dâ siâ biwi kat kat yeukne talañmapne âmâ gârânâk nemap.

³ Aregât luâk siâne sot hârok nemapne amâ galañe sonjo bo nemap aregât bo nângando gewiâp. Akto luâk sonjo bo nemapne amâ galañe sot hârok nemap are den âiân bo katmâ kotgâ anbiâp. Amâ Anutuñe galañe gala agañepgât.

⁴ Aregât gâ wangât Anutugât lau lokomapne den âiân katbiat? Amâ bo ârândân akbiap. Yâk amâ Anutu Humoñet enemjân kinmâ kârikne akbiap me yeukne akbiap. Are âmâ Kembugât pat. Gârâmâ hin nângâne. Humoñe âlepne tângombo kârikne akmâ kinbiapgât bo yeukne akbiap.

⁵ Hainâk luâk siâ hilâmgât âi meme siâ nângâmbo gembo siâ nângâmbo humo akmap. Dâ luâk siâ

âmâ âi meme hârok nângâmbo ârândân akmap. Aregât siâ me siâne hin me hain akberâm nângâm heŋgemgom kârigem kinmâ akbiâp.

⁶ Hilâm âi meme oyaŋmâ potatmapŋe amâ Kembugât akmap. Dâ Anutu mepaiŋe memapgât Kembugât pat akbiâp.

⁷ Aregât keiŋe hin. Nengâlânba siâne ikiŋe kârikjân bo manbiâp. Dâ ikiŋaet akmâ bo mombiâp.

⁸ Manman nenŋe amâ Kembugât akmâ manmaen. Dâ mombaen amâ hainâk yâkgât akmâ mombaen. Aregât manbaen me mombaen are amâ Kembugât pat.

⁹ Akto Kristoŋe momoŋe akto golâ yengât kautŋe akmâ damun nenŋe akbiapgât mom âmâ golâ agep.

¹⁰ Akto gâ wangât gala den âiân katmâ hâkŋe tunmâ akmat? Me wangât galagaet nângâmenâ gewiap? Nen hârok Anutuŋe makmâ hârenengiwiapgât tat tatgât enemjân kinbaen aregât galagaet bo makmâ kotgâwiat.

¹¹ Anutugât denŋande hin dêep.

Kembuŋe hin dêep, “Nâ mandângât luâk âmbâle hârokŋe nâ pâwut liginjbai. Akto hârokŋe kotnaet nângâmbiâ humo akto makmâ mem owâiŋe ketugunekbai.” dêep.

¹² Aregât nen hârok Anutugât metenjân kinmâ keinenŋe makmâ miawakbaen.

¹³ Aregât nen nenŋeâk den âiân bo makmâ bo hâk nenŋe tunmâ aŋgi goaŋgi akbaen. Dâ hin aktenŋe ârândân agâk. Galalupnenŋe han gulip akbâigât wan me wan bâleŋe dâpyenjân bo katenŋe keiyenŋe bo peŋ panbei.

14 Nâ Kembu Yesu olop mandân aregât hin nângâm kêrigeân. Sot siâ siâ nendere amâ bâleje bo akniņmap. Gârâmâ siâje sot siâ me siâ ire nem bâleje miawak niņbop dâm âmâ hanâk nemiap yâk âmâ bundâk bâleje miawaganbiap.

15 Aregât gâje galagât sotgât bo nângâm hanoko aganmenâ hanje mokmok membiâp amâ han kalemjaet pat bo akmat. Galage âlepje agâkgât gai Kristoje yâkgât akmâ moep. Aregât nângâm galagande sotgât nângâmbo umatje akmapgât nângâmâk akmâ nem manben.

16 Ye siâ me siâ membiâ ârândân akmap are luâk bikjande nângâmbiâ gewopgât damunje kêrikje akmâ manbei.

Sot songoje manman kêrikjaet tân bo akbiâp.

17 Akto luâk âmâbâle bikje Anutuje damun nenje akmap sot bikje sapa aktenje ârândân akbiap dâm âmâ Anutugât keje bo nângâmai. Anutuje damun nenje akmap aregât keje amâ hin. Anutuje nenekmâ dosaje bo dâm ikiye Heak nengimbo tân nengumbo Anutuje denân bo katnenekbiap dâm heroje aktenje biwinenje sândugemap.

18 Siâje dâp are tâlim Kristo hoņ mananđo are Anutuje ekto âlepje akbiap. Akto luâk bikjande gai nânganbiâ ârândân akbiap.

19 Aregât nen gala tân agu agu akmâ kindenje biwinenje sândugeâkgât kêrikje akniâm.

20 Gâ sotgât akmâ Anutugât âi are bo itij gulam memben. Amâ sot songo are âlepje hârok. Gârâmâ gâ hanâk hanâk nem manmenâ galagande gekto bo ârândân akto hanje bâlimbo âmâ bâleje miawakgiņbiap.

21 Gâ galagaet nângâ nângâne gâlikowâtgât yâkgât akmâ sonjo akto wain tunje hâkânje akmenâ ârândân akbiâp.

22 Aregât siâ me siâ hain aregât nângâm âmâ hangân yendâp are Anutugât metenân mem manmenâ gugaet biwigânâk yembiâp. Aregât siâne ikinjaet nângâmbo ârândân akto âmâ ikinje den âiân bo kalakto biwinje sândugembo heronje akmap.

23 Dâ siâne sot sonjo hanokoagân nendo bâliwiap. Amâ hingât. Yâk Kristo nânganjo huraguepgât bo nângâm nemap aregât. Akto siâ me siâ are biwi kat kat olop bo aktenje dosanje olop akbiap.

15

Yesugât nângâ nângâ watmâ manbaen.

1 Galama, kârikne olop manmaen nenje âmâ yeukne manmai are sokom katyektenje ârândân akbiâp. Sokom katyekmâ âmâ nenjaet nângâ nângâ nenjan bo maniâm.

2 Nen galalupnenje yâk yengât nângâmâk âlepne aknet akto Kristo nânganbiâ humo agâkgât tânyenjuniam.

3 Aregât keine hin. Kristone âmâ hainâgâk ikinje ukenje bo walep. Dâ Anutugât denjande hin maktâp, “Anutu, gâ hâkânge dâm dâyi yâk yengât den are nângât kaknân âgâep.” dâep aregât den walep.

4 Are tâmbâne dondâ den makmâ kulemgoyi are Anutugât keine nângâm henngemgone gât kulemgoyi. Anutugât kulemne hârokne mem kârikne mânginenekmâ mem owâinenekto siâ

me siâ nengât pat dâtâne nânghâenne biwinenne owâiwiapgât kulemgoyi.

⁵ Anutuje kârikne aknengimapgât akto mem owâinenekbiap gât ambonande akyengimbo Yesu Kristogât dopnân han nânghâ nânghâ konok akmâ manbaigât ulilandân.

⁶ Ulilandere akyengimbo han biwiyene mendugumbo Kembu Yesu Kristo yâkgât Ewene Anutu mepaije mem manbai.

⁷ Aregât Anutugât kotne humo agâkgât Kristone meyegep dop hain âgâk ye gala aganjim manbei.

⁸ Aregât hin makyengiwe. Anutuje hakulupnenne den pat âlepne makmâ hengemgom makyengiep are bunne miawagâkgât Anutuje amâ den bunneâk makmap a hârok nânghânetgât Kristone Yuda nengât akmâ hoj bawa aknengiep.

⁹ Hain aknengim amâ Yuda luâk âmbâle bo manmai yâkne Anutuje han kalemjaet akyengiepgât mepaije mem herone aganbiâ kotne agatbiâp. Aregât Anutugât denne bikne hin tatâp,

“Nâne Yuda luâk bo manmai yâk yengât hutyenân kinmâ mepaige mem kinmâ kep kom kotge patne makmâ egâlianbian.”

¹⁰ Akto den siâ hin tatâp,

“Yuda luâk bo manmai yene Anutugât kâmotlupne olop makmâ herone marone akbei.”

¹¹ Akto siâ hin,

“Yuda luâk bo manmai ye hârokne Kembu makmâ mepaije membei. Dâ luâkne luâkne hârokne yâkgât akmâ owâine aganbei.”

¹² Akto Yesaianje hin kulemgoep,

“Lâwin penâñe Yesegât kâmñe siâ miawakmâ yâkñe Yuda luâk bo manmai damunyeñe akto nânğanbiâ biwiyene owâine akbiap.”

¹³ Galama, Anutuñe biwi owâi aknengimapgât Amboñe yeñe nânğanigât akmâ wâtñande totokoyekto herone marone nânğambiâ biwiyene sândugembo Heakgât kârikñeñe yengimbo himbingât nânğâm owâine akmâ manmâ âgâwaigât ulilandân.

Paulone âi âlepñæet mârune agep.

¹⁴ Galalupne yeñe han kalemyene yendâp are akto Anutugât keñe âlepne nânğâm heñgemgomai aregât yepak mem kârigeakbaigât bo pâpkowai. Are keiyene nânğâm heñgemgoân.

¹⁵ Hain nânğan gârâmâ hanâk Anutuñe han kalemñæet niñepgât den bikñe meteâk kulemgom kinmâ Anutugât keñe nânğayenjiân.

¹⁶ Yesu Kristone Yuda luâk bo manmai yâk yengât akmâ âi membiangât wâtñe niñep. Aregât akmâ Anutugât pat âlep denñæet sumbegât âi mendere Heakñe hanyenân han kâmdâk katyengimbo Kembangât sumbe akbiâ Anutuñe ekto ârândân akbiap. Amâ Yuda luâk bo yâk yengât.

¹⁷ Aregât Anutugât âi meman are Yesu Kristogât akmâ nânğare agat agat akmap.

¹⁸ Âi are âmâ nunaet kârikñân wannande mem-bom. Bo. Yesu Kristone Yuda luâk bo manmaine Anutugât lau lokowaigât wâtñe niñep aregât âi mem makyenjamin.

¹⁹ Akto kulem bo egekñe keñe keñæet kârikñe akto Heakgât kârikñe aregât akmâ Yerusalem

kepiamba Kristogât keiŋe makmâ hân hârok ândeanmâ makmâ sambelem arire Ilurikon hânân ârândân agep.

²⁰ Hain akmâ luâk bikŋe yeŋgât âi kalamân gaetŋe membomgât Kristogât keiŋe bonâŋgâmai ain kârikŋe akmâ makyenŋiwerâm aktere humo akmap.

Pauloŋe Roma kepia ewangim Sipen ariwiapgât magep.

²¹ Anutugât denŋe bikŋe hin tatâp. Aregât dopŋân akman,

“Siâŋe yâkgât pat bo makyenŋimbiâ manmâ gayi yâkŋe yâk ekbai. Dâ yâkgât patŋe bo nâŋgâm gayi yâkŋe yâk nâŋgarbai.”

²² Den aregât akmâ yeŋgâlân togowerâm kindere sop ârândân wan me wan siâŋe dâp tiginiep.

²³ Dâ manmâ gan ain yeŋgâlân togowerâm hanande nâŋgâm malân aregât akto hân iregen âine bo tatniŋdâpgât.

²⁴ Sipen hânân ariwerâm akmâ yeŋgâlân togowerâm nâŋgân. Togom ye olop makmâ kârikŋeâk tân agum akmâ dâp heŋgemgom katnekiâ hepunyekmâ owâiŋeâk Sipen hânân ariwian.

²⁵ Gârâmâ hinŋe âmâ Yesugât kâmot Yerusalem manmai yeŋgât akmâ puli mem arim yeŋgiwerâm aktân.

²⁶ Amâ hingât. Makedonia hân akto Akaia hânân gâtŋe Yesu nâŋgarmaiŋe, Yesugât kâmot Yerusalem kepiam umburuk manmai yâk tânyenŋuwerâm owâim puli kali.

²⁷ Amâ han kalem yeŋaet akmâ katbiâ ârândân agep. Yuda luâk bo manmaine amâ Yesugât den pat amâ Yuda luâk yâk yeŋgâlânba nâŋgâyigât hâuŋe potatmâ yeŋgimbiâ ârândân akbiâp. Hain dâm herone akmâ puli kali.

²⁸ Puli katbiâ huraguep are mem Yerusalem kepien arim yeŋgire bo akto Sipeŋ hânân ari-wiangât yeŋgâlân soŋ togowian.

²⁹ Aregât hin nâŋgân. Nâ yeŋgâlân siâ me siâ bâlâk bo togowian. Kristone meme akniŋmap are mem togom yeŋgire nâŋgâm âmâ herone marone manbai.

³⁰ Galalupne, Kembunenŋe Yesu Kristogât akmâ akto Heakgât han kalemgât akmâ ondop pâron den makyenŋiwe. Ye nâŋgât akmâ nâ olop Anutuŋe tânnuguâkgât wârakmâ Anutu ulilanbaen.

³¹ Ye nâŋgât ulilanbiâ âmâ Yuda hânân gâtŋe Anutu bonânŋanmai arekŋe menekbâigât Anutuŋe bâtyenânba mem oloŋnekbiap. Akto Yesugât kâmot Yerusalem ain manmai yeŋgât akmâ puli kali are mem yeŋgire ukenŋe agâkgât ulilanbei.

³² Hain ulilanbiâ Anutuŋe nâŋgâyeŋgim meme akniŋdo herone akmâ yeŋgâlân togom tatere biwi owâiâk akniŋbai.

³³ Anutu lumbe Ambone âmâ ye olop manbiâp. A bundâk.

16

Paulone Roma yeŋgât nâŋgâyeŋgim malep.

¹ Galalupne, âmâle siâ kotŋe Poibe yâkŋe Yesugât kâmot Keŋkerei kepien manmai tânyenŋum manmap. Yâkŋe yeŋgâlân togombo ye dowâk gala aganbai.

² Gala agañmâ Kembangât akmâ âmbâle arekņe nâ akto bikņe dondâ hoņ bawa nengiep aregât wan me wan bo talaņbiap are dowâk mem waņmâ tângowei.

³ Akto luâk âmbâi lâuwâ Akuila akto Pirisila Yesu Kristogât âiņaet tân nugumandat yâk maņgan yelekņet.

⁴ Yâk lâuwâ âmâ nâņgât akmâ âi humo mem hâk hilâlâm nâņgâm bâsok moyiat. Aregât nâņeak bo, Kristogât kâmot Yuda bo manmai kâmotnenņe yâk yetgât okot âlep nâņgâyetkim manden.

⁵ Yâk yetgât emelan Kristogât kâmot mendugumai are nâņgât akmâ maņgan yekbei. Akto galane siâ kotņe Epaineto Asia hân humo ain ulikņân akmâ Kristo nâņganep yâk gai maņganbei.

⁶ Akto âmbâle kotņe Mariane yeņgât akmâ âi humo miep aregât yâk gai hainâk maņganbei.

⁷ Akto nâņgât kâmolân gâtņe lâuwâ Androniko akto Yunia ulikņân nâ Kristo bo nâņganânân sop ain nâņganjat. Akto beirâ tembe lokoņe hiko negi sop ain hainâk katyelekbiâ nâ olop talion. Hain akmâ manmâ gambela nen Aposolo manmaen nenņe yâk yetgât heroņe akmaen aregât nâņgât makyetkiwei.

⁸ Akto nâ Humogât akmâ luâk siâ kotņe Ampil-iato yâkgât okotne nâņgân aregât maņganbei.

⁹ Akto Urbanoņe Kristogât âi meyionân olop miep yâk akto galane Sitaki maņganyelektân gât makyetkiņet.

¹⁰ Apelene Kristogât akmâ âi humo mem bo hâkâņ agep are nen hârok nâņgâenņe ârândâņ agep yâk akto Aristobulo yâkgât kâmot gai maņgan yekbei.

11 Akto Yuda luâk galane Herodiongât akto Narikisogât kâmot bikne Humogât akmâ manmai yâk yengât nângâre âgâp aregât mangan yekbei.

12 Akto âmbâi lâuwâ Tiripaina akto Tiripose Kembangât akmâ âi humo mem mandat, yâk akto âmbâle siâ Peasi arekne Humogât âi mem hâk hilâlâm nângâep yâk hârok mangan yekbei.

13 Kembuñe luâk siâ kotne Rupu oloñep yâk akto yâkgât memene dop akmâ tân naguep yâk lâuwâ lâuwâ mangan yeleknjet.

14 Akto luâk kotyene Asin̄krito, Pilegoñ, Hereme, Patoroba, Herema akto Anutugât kâmot bikne olop manmai yâk manganyekñet.

15 Akto luâk âmbâi lâuwâ Pilorogo akto Yulia akto luâk siâ Nereo akto garine akto luâk Olumpa akto Kristogât kâmot yâk olop manmai yâk hârok mangan yekñet.

16 Yekai hainâk Kembangât akmâ bâtyene koan̄ñet. Akto hânne hânne Kristogât kâmot yâkne yengât nângâ yengim mandâi.

Miti luâk hian̄gim yengât sami magep.

17 Galalupne, yengât hutyenân gâtñande ye umatñân manmâ potalakbaigât gâlikoyekberâm akmai luâk are yengât nângâm heñgemgom damun akmâ hamep akbei. Yâkne Kristogât keñe ye nângâ meteyi are mem gulip kowerâm manmai aregât hamiyengim yâk bonângâ yengiwei.

18 Luâk hain arekne Kembu nenne Kristo hoñ bawa bo agañmai. Amâ yeñæet tep yeñæet nângâmbiâ agato aregât hoñ agañmai. Akto luâk âmbâle biwiyene bo damunne akmai yâk

makyenġim mulun yekmâ heyenġimbiâ biwiyenġe gulip akmap.

¹⁹ Dâ ye âmâ Kristogât den lokomai aregât patġe kepia ârândânġ sambelem arimbo nânġâm meteyi aregât yenġât akmâ heronġe akman. Heronġe akmâ âmâ yenġât han kau nânġâm hin akġetġât makyenġiwe. Siâ me siâ âlepġaet biwi owâi kakġân manbei. Dâ siâ me siâ bâlenġande hâwât yekto âmâ bo nânġanġbei.

²⁰ Ye hain akmâ manbiâ âmâ sop kâlep bo aktoân Anutu biwiyenġe sândugeâġġât ambonġande Niambi keiyenġe amukġân hâkokombo tâliwai. Kembunenġe Yesu Kristogât han kalemġe yenġâlân yembiâp.

Gala den.

²¹ Galane Timoteo bât tângone akto Yuda kâmotlupne yenġâlân ġâtġe Lukio, Yasonġ, Sosipate yâġġe yenġât nânġâyenġiâi.

²² Akto nâ Teatio, nâ kulem ire Paulonġe makniġdo kulemġoân nânġe Kemputġât akmâ nânġâ yenġiân.

²³ Gaionġe nâ Paulo akto kâmot hârok in tân nengumap hainâġ yenġât nânġâ yenġiâp.

Akto luâġ Erastonġe kepia ireġât puli damunġe akmap akto gala nenġe Koato yâġġe hainagâġ ak-tat.

Anutu akto Nanġe Yesu yetġât kot humo.

²⁴ Kembu nenġe Yesu Kristo yâġġât han kalemġe yenġâlân yem âġâwiap. A bundâġ.

²⁵ Anutugât pat âlep makman akto Yesu Kristogât kot makmâ sambeleman, aregât dowân Anutunġe tânyenġuwiapġât bo pâpkomap. Akto kârikġe meyekbiapġât kârikġe talaġdâp. Anutu manman

kârikŋaet denŋe amâ yoŋâk yem gam malep âmâ hinŋe miapŋân miawagep.

²⁶ Anutugât propetelupŋande Anutugât den keiŋe kulemgoyi talep are hinŋe Anutu manman kârikŋe Amboŋande makto hânŋe hânŋe sambelem ariep. Amâ hânŋe hânŋe manmaine Kristo nânŋaŋmâ Anutugât lau lokowai gât Anutuŋe makto miapŋân sambelem ariep.

²⁷ Aregât Anutu ikiŋe han nânŋâ nânŋâ humo talaŋdâp konok are Yesu Kristogât akmâ egâliaŋŋe humo makmâ agaŋdenŋe yem âgâwiâp kârikŋe. A bundâk.

Yusugât Pat Âlep Den
The New Testament in the Timbe Language of Papua
New Guinea
Nupela Testamen long tokples Timbe long Niugini

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 28 Dec 2024 from source files dated 31 Aug 2023

03f82704-6ad1-5094-a78e-e240d9f2d4f8